


# NZAMBI WA BUKOLÈ

## MUBUULULA KUMPÀLÀ KWÈTÙ

 Ndi ne ndambu wa Mifundu mifunda, pa yôyi ayi mpândi njinga kwakula neenu, ne ndi ne dyeyemena ne Nzambi neabeneshè didifila dyetu dikese edi.

2 Mpindyewu, bantu bààbûngì batu anu badikonka bwa cinyi tudi bantu baa pabwabu ne biikale twenza mitooyi mikole. Nudi bamanye, eci cibilu ncyà—ncyà mushindu mushiilangane ne citu bantu ne—ne ciibidilu cya kumonamona. Nenku, pa ciibidilu, byônsò bitu anu bya mushindu wa mumana kulongolola. Kadi patudi tulwa ku bibilu ebi, mûndi mupeteku paanyi dyèsè edi mpindyewu kukaadi bidimu mulongolongo kacya kubangilebo musangu wa kumpala kwaka, nenku katwena mene bamanye ne citwenzà ncinyi to. Tudi tulwa peetu anu cyanaana kadi kudilambula. Ke cintu cimwepele citudi bamanye bwa kwenza. Nenku Nzambi ke udi wenza bikwabo bidi bishaala. Pa nanku aci ke cidì cituwijà bantu badi benza maalù a pabwawu menemene.

3 Dîngà dituku, muntu kampanda kwambaye ne: “Udi mumanye’s, nwênù aba nudi bimonyamonya anu byetu bya bushuwa ebi.”

Mêmè ne: “Ee, ngela—ngela meeji ne ke citudi’s.”

4 Nenku ndi mvuluka mu cimwe cya ku bibilu. Mwaneetu Troy uvwa undondela musangu kampanda bwa kalumyana kakwabo kaa cyena Allemagne kavwa kamba ne kavwa kapete dibatiiza dya Nyuma Mwîmpè. Nenku dituku dyakalonda, mu cyapu muvwaku kenzela mudimu, kavwa mwa kwela byanza muulu kadi kutumbisha Mukalenge, ne kwakula mu myakulu ne kwenza anu maalù bûngì cyanaana, kaàyi asankisha to. Ke ndekeelu wa byônsò, mfumwaku wa mudimu kuseemenaye e kwamba ne: “Heini, ncilumbu kaayi eci wêwè’s?”

5 Yêyè ne: “Kaa, s’ndi musungidiibwe.” Yêyè ne: “Mwoyi wanyi mmûle ne disanka diyiila ne panshi.”

6 Yêyè ne: “Ee, udi ne cya kwikala mukapetangane ne musumba wa bapâle lwa kwinshi kwaka.”

7 Yêyè ne: “Eyo. Butumbi kudi Nzambi!” Yêyè ne: “Ndi nsakidila Mukalenge bwa bapâle.” Yêyè ne—yêyè ne: “Angata anu mashinyi etu aa, enda apweka ne njila.” Yêyè ne: “Umusha anu màlù ônsò adiku awu, kwakushaala ne cintu to anu mushiki wa ‘bilatalata.’” [Mwaku *nut* mu Anglais udi uswa kwamba ne

“bùlù” anyi “mupâle”—Muk.] Nenu aci cidi anu . . . Ncyeze bu cya bushuwa, nudi bamanye.

<sup>8</sup> Dîngà dituku, mu Californie, mvwa ngenda mpweka ne misèsèstù ya mu Los Angeles, ke mêmè kumona muntu ne cimanyinu cifunda pa cyâdi, ne *apa*. Nenu uvwa wamba ne: “Ndi mupâle bwa Kilisto.” Nenu bantu bônso bavwa anu bamutangila. Ke mêmè kumona bakudimuka bamutangila, pavwaye mumane kupita. Ke mêmè kudyambidila ne mvwa mwa kwenza bu bakwabo abu. Nenu pa . . . paanyima pende apu, uvwa wamba ne: “Wêwè udi mupâle wa nganyi?” Eyo. Ngela meeji ne twètù bônso tudi bantu baa pabwabo mu mushindu kampanda, ewu kudi ewu, nudi bamanye.

<sup>9</sup> Kadi, nudi bamanye, baa pa buloba badi batamba kubwela mu biibidilu anu bimwebimwe, mu mushindu wa ne cintu cya cishiilangane cidi cilwa cya pabwaci, mu mushindu wa ne bantu babanga kudyambidila ne ncintu cya cibi. Nenu pa ciibidilu Nzambi bikengela ênzè cintu cya pabwaci, bwa kwaluja cyakabidi bantu ku Bible.

<sup>10</sup> Ndi mwa kudifwanyikijila ne Noa uvwa mwenze bu—bu mupâle, bwa cikondo cya maalu a mamanya civwaye ne mwoyi aci, bwalu bôbô bavwa mwa kujaadika ne kakuwu mâyi mu maulu to. Kadi Nzambi uvwa mwambe ne neikalemu. Pa nanku, Noa, mwikale uyiisha ne watabuuja ciine aci, wakalwa mupâle.

<sup>11</sup> Kabidi ndi mufwanyine kudifwanyikijila ne paakapweka Môsà mu Ejipitu, uvwa mwenze bu—bu mupâle, bwa Pâlò. Kadi vulukaayi ne, Pâlò uvwa mupâle, kudiye, yêyè pende. Pa nanku bavwa . . . Ke citudi tufika ku dyumvwa.

<sup>12</sup> Nansha Yesu baakamwangata bu mwabuludyanganyi. Ncya bushuwa. Martin Luther uvwa mupâle, kudi ekeleeziya wa Katolike. Ne John Wesley uvwa mupâle, kudi ba-Anglicans. Pa nanku, nudi bamanye, dîbà—dîbà dikaadi pa kwakana bwa mupâle mukwabo. Kanwenaku peenu nwela meeji nanku anyi? [Disangisha didi dyamba ne: “Amen.”—Muf.] Kadi, kumpala kwa kwikalaku bùlù, nudi bamanye, bikengela kwânji kwikale mulonda wa nsalu, dyambedi, bwa kubwejamu e kunyungulula.

<sup>13</sup> Pa nanku, nudi bamanye, Noa, bu muvwaye mupâle, yêyè . . . Bikengela bùlù, budi bukoka mulonda wa nsalu awu, bwa kukoka ne kutwangaja bintu kampanda, bushaala bulamakaje bintu kampanda. Pa nanku, Noa uvwa mukumbane kukoka aba bônso bavwa mwa kwitabuuja, kubabweja mu bwâtù, kubapatula mu manyooka, mu kwikala mupâle.

<sup>14</sup> Tudi tujandula, ne, Môsà wakakoka ekeleeziya kumupatula mu Ejipitu, mu kwikala mupâle. Ncya bushuwa.

<sup>15</sup> Ngela meeji ne bidi bitukengela mupâle mpindyewu, bwa yêyè kukoka Mukaji musela kumupatula mu ekeleeziya. Bidi bitukengela cintu kampanda mpindyewu, cikwabo, pa nanku tudi bantu baa mushindu wa pabwawu menemene. Nenu mvwa

mwele meeji, diloolo edi ne, bu Mukalenge mwa kwanyisha, nênteteè bwa kubala ndambu wa Mifundu idi itangila bwine bwalu ebu, nenku mufwanyine kwakulaku neenu mutanci mukese, bwa mmone mwa kunuleeja bwa cinyi twètù tudi bantu baa pabwabo baa mushindu awu.

<sup>16</sup> Tubuululaayi mu Mifundu mpindyewu, mu Filipooyi nshapita 2, 1-8, ne Kolinto Mwibîdi 3.6. Nenku tubalaayi, bu mutudi twitabuuja Dîyî dya Nzambi.

<sup>17</sup> Nenku mpindyewu, kumpala mene kwa twètù kubala, twinyikaayi mitu yetu bwa kusambila.

<sup>18</sup> Taatu wa mu Dyulu wa ngàsà, tudi bushuwa cisamba cya dyêsè, diloolo edi, bwa kwikala ne mwoyi mu cikondo eci, ne kumona maalu atudi tumona enzeka aa, ne bwa kumanya ne dîbà dikaadi pabwîpî menemene, diikala Yesu mwa kuvwila Ekeleeziya Wende. Kaa, aci's cidi cyenza ne myoyi yetu itupike ne disanka, Mukalenge! Nenku patudi tubuulula mabeji aa, diloolo edi, tudi tulomba bwa Wêwè watupa dyumvwija dya kubala eku. Nenku swaku bwa Nyuma Mwîmpè abuulwile myoyi yetu maalu adi mafwanyine kwikala mîmpè ne adi asankisha Nzambi. Bwalu tudi tulomba nunku mu Dînà dya Yesu. Amen.

<sup>19</sup> Nudi bamanye, ngela meeji ne nênnùlòmbè bwa kwenza cintu kampanda. Ntu—ntu pa ciibidilu ndomba bintu kampanda bya pabwabi, kadi ndi ne ditekemena dya ne ncyakulomba cintu cya citambe kwikala cya pabwaci to. Kadi patutu tucipa cyeleka ku dibendela, tutu twimanyina bônso kuulu. Ne—ne patu dibendela dipita, tutu tujuuka kuulu; bwalu, cyôci aci ncitu cikengela twètù kwenza. Kabidi tutu tujuukila kuulu, bwa kwela dibendela mwoyi. Tujuukilaayaaku kuulu patudi tubala Dîyî apa, bu nwênù mwa kuswa, Kolinto Mwibîdi 3.6.

*Yêyè...udi mutuwije bambi bakumbanyine baa dipungila dipyadipya; kadiyi dya dileeta to, kadi dya nyuma: bwalu dileeta didi dishipa, kadi nyuma udi ufila mwoyi.*

*Kadi piikala—kadi piikala mudimu wa lufu, mufunda ne mutapa pa mabwe, uwu wa butumbi, mu mushindu wa ne bânà baa Izaleela kabavwa mwa kushaala batangile ne kulengameena kwônso mpala wa Môsà bwa butumbi bwa lukebu lwende; butumbi bwine abu mbuwuwa ne cya kuumushiibwa,*

*Amba tûng muvwa mudimu wa nyuma ne cya kwikala ne butumbi butambe?*

*Bwalu piikala mudimu wa dipiila mwikale wa butumbi, mu mushindu awu mudimu wa bwakane mmutambidile ku butumbi.*

*Bwalu nansha ciine cyakavwijiibwa cya butumbi aci kacivwa ne butumbi bwine mu mushindu ewu to, bwa tubingila twa butumbi budi butambidile.*

*Bwalu piikala eci cidi cyumushiibwe civwa cya butumbi, mmunyi. . . anyi cidi cishaala citamba kwikala cya butumbi.*

*Nanku bu mudibi ne twètù tudi ne ditekemena dya mushindu ewu, tudi twangata didilekelela dinene dya ngaakwilu.*

*Nenku kabiyi bu Mòsà to, uvwa uteeka cibwikilu pampala pende, bwa bânà baa Izaleela kabapeci mushindu wa kumona ne kulengameena kwònsò ndekeelu wa civwa cyumushiibwe:*

*Kadi meeji abo avwa mafofomija: bwalu too ne ku dituku edi cibwikilu cimwecimwe cidi kaciyi cyumusha aci cidi cishaala padibo babala dipungila dikulukulu; cyòci cibwikilu aci ncyumushiibwe mu Kilisto.*

*Kadi nansha too ne ku dituku edi, padibo babala Mòsà, cibwikilu aci cidi pa mwoyi wabo.*

*Nansha nanku piikalawu mukudimuna kudi Mukalenge, cibwikilu aci ncyumushiibwe. Kabiyi. . .*

*Mpindyewu Mukalenge ke udi Nyuma awu: ne kudi Nyuma wa Mukalenge aku, ke kudi budishikaminyi.*

*Kadi twètù bònsò, ne mpala kayiyi mibwikila to tudi tutangila byenze bu mu lumwenu butumbi bwa Mukalenge, dikudimuka dya mu cimfwanyi cimwecimwe aci ku butumbi ne ku butumbi, byenze anu bu ku Nyuma wa Mukalenge.*

<sup>20</sup> Ne mu Filipinoyi 2, tudi tubala nunku, biikale tubangila ku mvensa 1, twenda tubala too ne ku wa 8.

*Nenku piikalaku—piikalaku busambi kampanda mu Kilisto, piikalaku dikankamika kampanda dya dinanga, . . . dyumvwangana kampanda dya Nyuma, piikalaku mwoyi kampanda wa luse,*

*Vwijaayi disanka dyanyi dikumbane, bwa nwikale ne meeji a mwomumwe, biikale ne dinanga dya mwomumwe, biikale mu dyumvwangana dimwe, ne meeji amwe.*

*Kakwenzeki cintu bwa dikokangana anyi bwa butumbi bwa patupu to; kadi mu didipwekesha dya mu meeji muntu ne muntu abale bakwabo bu bimpè kumutamba yèyè.*

*Muntu ne muntu katangidi anu maalu ende yèyè mwine to, kadi muntu ne muntu atangile kabidi. . . maalu a bakwabo.*

*Meeji aa ikale munda mwenu, a bwena avwa kabidi munda mwa Yesu Kilisto:*

*Yêyè, mwikale mu mmwenekelu wa Nzambi, kaakeelaku meeji ne ncintu cya kunyenga bwa kwikala mwomunwe ne Nzambi to:*

*Kadi wakadivwija yêyè mwine bu kayi wa lumu, ne wakadyangacila mmwenekelu wa musadidi, ne wakavwijibwa mu cimfwanyi cya bantu:*

*Nenku paakasanganyibwaye mu mushindu wa muntu, wakadipwekesha, ne wakashaala mutumikidi too ne ku lufu, ku lufu mene lwa ku nkuruse.*

21 Tusambilaayi.

22 Taatu wa mu Dyulu, Dìyì dinene edi didi dibadiibwe, diloolo edi, mu Mifundu Yebe ya Cijila, uDivwijeku dya bushuwa menemene munda mwa myoyi yetu, bwa tùmuka mwaba ewu bu bavwa bafumina ku Emawuse abu, biikale twamba ne: “Myoyi yetu kayivwa mikwate kapyà munda mwetu pavwaYe wakula neetu mu njila apu anyi?” Bwalu tudi tulomba nunku mu Dìnà dya Yesu. Amen.

Nudi mwa kusòmbelaayi panshi.

23 Mpindyewu, eku kubala nkwa pabwaku, kadi ndi ngela meeji ne nkukumbanangane bikole ne budi panshi ebu. Mwawa muswe kwakula pa cyena bwalu cya ne: *Nzambi Wa Bukolè Mubuulula Kumpàlà Kwètù.*

24 Mpindyewu, kubangila anu kacya muntu wikalaku, kudi nzala mu mwoyi wa muntu, ya kujandula kudiye mufume ne mpenyi, ne kabingila kende kaa diikalaye mwaba ewu nkaa cinyi, ne kuyaayaye mpenyi. Kudi anu Umwepele udi mwa kwandamuna ku aci, ng’Ewu Wâkamufikisha mwaba ewu awu. Ne muntu utu misangu yònsò anu ujinga kumona Nzambi.

25 Kale wawa mu Dipungila Dikulukulu, tudi tujandula ne Nzambi uvwa uDibwikila usokoma beena bupidya. Nzambi utu ne mushindu wa pabwawu wa kukwata mudimu ne bantu. Utu Usokoma mwena bupidya kadi mwikale uDibuulula kudi mwena kwitabuuja. Ke citu Nzambi wenza. Yesu wakasakidila Taatu, ne, Yêyè wakasokoka beena lungenyi ne batalame maalu aa, ne uvwa mwa kubibuulwila bânà bu aba badi baswe kuyiila. Pa nanku, tudi tusangana ne Nzambi katuku ushintuluka to, mu ngiikadilu Wende, ne Yêyè udi wenza mudimu Wende anu mushindu umweumwe awu. Tudi tujandula, mu Maalaki 3 ne, Yêyè mmwambe ne: “Ndi Nzambi, Ncyèna nshintuluka to.” Pa nanku, Yêyè utu ukwata mudimu bilondeshile dìyì dikulu dimwedimwe adi, dîbà dyònsò.

26 Mpindyewu tudi twangata umwe wa ku mikanda ya kale menemene ya Bible. Pavwa Yobo, umwe wa ku bantu bavwa batambe kwikala baakane baa mu dituku dyende, muntu

mupwangane mu mikenji ya Nzambi, musadidi, wa ngiikadilu milenga be, musadidi wa kuneemekibwa, mu mushindu wa Nzambi mwine wamba ne: “Kakwena muntu nansha umwe bu yêyê to, pa buloba.” Kadi . . . dijinga dyende, cikondo kampanda, dya kumona Nzambi. Uvwa mumanye ne Nzambi uvwaku, ke kuumvwaye ne uvwa uringa kuMumona, anyi, mu mushindu mukwabo, kuya kumbelu Kwende kadi kukookola ku ciibi, kwamba ne: “Ndi njinga kuyiikilanganaku Neebe.” Kusombela panshi, kuyiikilangana Nende, mushindu utudi twêtù aba bafwanyine kuyiikilangana ne bakwetu ewu.

<sup>27</sup> Tudi ne dyumvwa kampanda. Ke bwa cinyi tudi mu bibilu ebi, mutudi tudisangisha ne—ne twamba patooke meeji atudi naawu. Nenku—nenku tudi tuumvwangana ewu ne ewu, bîmpê menemene, patudi tuumvwijangana maalu muntu ne mukwende. Ne ke citu bambi benza. Bantu baa bipidi byônsò bya nsombelu batu benza nanku, bumvwijangane maalu.

<sup>28</sup> Nenku, Yobo, Nzambi uvwa anu wetu wa bushuwa ewu kudiye, mu mushindu wa ne uvwa muswe kujandula ne kavwaku mwa kuya, kukookola ku ciibi Cyende, ne—ne kwenza Nende mu—muyiiki wa babidi.

<sup>29</sup> Kadi tudi tujandula ne Nzambi wakaakula nende anu byetu bya cya bushuwa ebi, kadi Yêyê mwikale mubwikila. Uvwa mubwikila mu mmwenekelu wa mvunda. Ke kwambilaYe Yobo bwa kusenayeye mukaba mu cifuka; Uvwa uringa kuyiikilangana nende, mùtù muntu uyiikila emu. Ke kupwekaYe mu mvunda kadi—kadi kuyiikilangana ne Yobo. Nenku Yêyê wakadimanyisha kudi Yobo mu mvunda, kadi kaakaMumona anu menemene to. Uvwa mwa kuumvwa anu mvunda utuuta ne unyunguluka, mu mici. Nenku Dîyi divwa dipatukila mu mvunda amu, kadi Nzambi uvwa mubwikila mu mvunda.

<sup>30</sup> Tudi tusangana, mu Afrike mwamwa, mu Afrike wa ku Sud, batu ne mwaku ewu *amoyah*, udi uumvwija ne, “bukole budi kabuyi bumweneka.”

<sup>31</sup> Nenku Bukole budi kabuyi bumweneka ebu, mu mvunda amu, buvwa ne Dîyi dya dyumvwika ku maci. Divwa dyakula bikole ne Yobo, kadi yêyê kayi mwa kumona mmwenekelu Wende to. Kadi Yêyê uvwa mubwikila, kudiye, kudi mvunda.

<sup>32</sup> Tudi tusangana umwe wa ku baprofeta banene baa mu Bible, Môsà, wa mu Dipungila Dikulukulu, umwe wa ku basadidi basungula baa Nzambi, basobola, badyanjila kulongolola, wakajinga pende bwa kuMumona. Ukaavwa mwikale pabwîpî menemene Nende, ne ukaavwa mumonemone bintu byâbûngî menemene bya cyanza Cyende cinene civwa kaciyi cimweneka aci ciikale cipitakana kumpala kwende ne cyenza bintu bivwa anu Nzambi nkaayende mufwanyine kwenza. Kujingaye bwa kuMumona dîngà dituku, ke Nzambi kumwambila ne: “Ndaaku, imanyina pa lubwebwe.”

<sup>33</sup> Nenuku pavwaye mwimanyine pa lubwebwe apu, Mòsà kuMumona upita. Kumonaye nyima Wende. Ke kwambaye ne: “Uvwa mufwanangane ne wa muntu, nyima wa muntu.” Kadi, kaakamona Nzambi to. Wakamona anu cibwikilu cya Nzambi.

<sup>34</sup> Bible utu mwambe ne: “Muntu nansha umwe katu mwanji kumonaku Nzambi kacya to, kadi umwepele Mulela wa Taatu ke udi muMumanyishe patooke.” Nenuku, Mòsà wakaMumona, mubwikila, mwenze bu Muntu. Tudi tusangana ne Yehowah wa Dipungila Dikulukulu ke uvwa Yesu wa Dipungila Dipyadipya.

<sup>35</sup> Nenuku—nenuku Docteur Scofield apa, tudi tusangana ne, mwaku wende yêyè, nkushintuluka kwa “mmwenekelu.” Tudi tusangana mwaku *en morphe*, mu cyena Ngelika, udi uumvwija ne “civwa kacyi cimweneka cyakavwijibwa cya cimweneka.” Cintu kampanda cidi kacyi mwa. . . Tudi bamanye ne cidiku. Cidi mwa kwikala. . . kacyna mwa kumweneka, kadi nansha nanku tudi bamanye ne cidiku. Nenuku paakashintululaYe mmwenekelu Wende, wa *en morphe*, cidi cyumvwija ne Yêyè wakashintuluka kuumuka ku citambe-mfukilu kuya ku cya mu bufuki.

<sup>36</sup> Nenuku Yêyè wakashintulula anu cibwikilu Cyende cya kwîsù cyanaana, mu ngaakwilu mukwabo. Ncyenze mùtù dinaya amu. Uvwa wenza dinaya. Nenuku ku beena Ngelika, pavwabo bashintulula cibwikilu cya kwîsù, pàmwâpa muntu umwepele unay-. . . munayi umwepele uvwa mwa kwikala munaye myaba ya banayi bashiileshiilangane bààbûngì.

<sup>37</sup> Kadi mwanaanyi wa bakaji, udi mwaba ewu ewu, mbafume ku dyanza mu tulaasa tubandile, di—dinaya. Nenuku mwânà wa balume umwepele ûntù mumanye, mmunaye myaba ya banayi batwe ku banaayi, kadi uvwa anu mwa kunyungulukila paanyima paa cibumba cya dinayila apu kadi kushintulula cibwikilu cyende—cyende cya kwîsù, bwa kupatukaye, bwa kunaya mwaba wa muntu mukwabo.

<sup>38</sup> Mpindyewu, nwênù baswe kwangata biprofeta bya mu Dipungila Dikulukulu bivwa byamba civwa Maasiya ne cya kwikala, nudi mwa kubifwanyikija ne nsòmbelu wa Yesu, nudi nupeta anu menemene ne Yesu uvwa nganyi. Kavwa anu muntu wetu wa patupu ewu to. Uvwa Nzambi, *en morphe*. Yêyè wakashintuluka kuumuka ku—ku citambe-mfukilu kubwela mu mmwenekelu wa mu bufuki wa Muntu. Kadi, Yêyè uvwa Nzambi, mmweneshiibwe mu mubidi, mubwikila kudi muntu, cibwikilu cya mubidi.

Nenuku tangilaayi Dipungila Dikulukulu.

<sup>39</sup> Ndi—ndi—ndi mumanye ne ndi munkaci mwa kwakula ne bateeleji basambakane, diloolo edi, bafumine ku bitupa bishiileshiilangane bya buloba. Nenuku tudi mwaba ewu mbwa kujandula. Citudi twenza ncinyi—ncinyi? Citudi ncinyi—ncinyi?

Tudi batangile penyi? Cidi munkaci mwa kwenzeka ncinyi? Byònsò ebi bidi byumvwija cinyi?

<sup>40</sup> Nunku mpindyewu tudi tusangana, muneemu emu, bwa ne, bu nwènù beena Yuda balume ne bakaji aba, ne baalaabi mu—mu—mu ntempelo, mu matuku akaadi mapite, bu ne bavwaku batangile Bible, biprofeta, pamutu paa bilele, nunku mbajingulule ne Yesu uvwa nganyi. Nunku kî mbaMubiikileku ne m'Beelezebula to. Nunku kî mbaMupoopele pa nkuruse to. Kadi, bivwa bikengela ne byònsò abi binayiibwe. Bivwa citupa cya dinaya. Kadi bôbò bavwa bafofomijiibwe, pa bwalu ebu.

<sup>41</sup> Bidi anu mudi bààbûngì beenu balume, bakaji, diloolo edi mwaba ewu, bafwanyine kwikala baa bidimu mumwe naanyi anyi bampicileku ndambu. Nudi bavuluke ne, muneemu mu Amerike emu, kukaadi bidimu, kumpala kwa . . .Ba-Chinois . . . Mwaneetu wa balume, wâleejìbu mwaba ewu ewu, ke bwalu abu kumvwila mu meeji pâmwà nyiikilangana nende. Mushindu uvwabo ne ciibidilu cya . . .Kabavwa mwa kwakula Anglais to, kadi bavwa—bavwa ne mashinyi a disukula bilâmbà. Nunku paudi uya ku mashinyi ende a disukula bilâmbà awu, bwa kukusukwilabo bilâmbà. Musukudi wa bilâmbà wa ba-Chinois awu uvwa mwa kwangata kabeji, ne uvwa mwa kukapanda mu mushindu kampanda. Wêwè udi wangata kapese kamwe kaa kabeji aku; yêyè uvwa wangata kakwabo kapese. Kadi paukaadi walukila bwa kulomba bintu byebe, bivwa bikengela ne tupese tubidi twa kabeji atu tupetangane. Kadi pavwatu katuyi tupentangana kantu ne kantu menemene to . . .Kuvwa mwa kukatentula mushindu kaayi kana wònsò to, bwalu yêyè uvwa ne kapese ne wêwè peebe ne kakwabo. Nunku kwôkô kwikale ditentula . . .Nunku uvwa ne bukenji bwa kulomba bivwa byebe wêwè. Nunku ewu udi mupete bivwa byebe wêwè, paudi ne kapese kakwabo kaa mukanda wa dyumvwangana aku.

<sup>42</sup> Ke mudibi, diloolo edi, patudi ne kapese kakwabo kaa mukanda wa dyumvwangana apa. Nzambi, paakapandululaYe Mwanende mu bipese bibidi, ku Kalvariyo, wakangata mubidi e kuwubandisha muulu bu Mulambu, ne kutupingajila Nyuma panshi, wâkasòmbela musangu kampanda mu Muntu awu, Yesu. Nzambi umweumwe awu udi mu cibwikilu diloolo edi, mu mmwenekelu wa Nyuma Mwîmpè. Bikengela tupese tubidi atu tutwangane, pa dîbà adi udi cipese cya mukanda awu wa dyumvwangana. Ncidi Nzambi mwenze, bwa kumanyika bîmpè menemene kudi muntu, pààkaDyénzàYe Muntu.

<sup>43</sup> Mvwa mbala bwalu kampanda buvwabo balonde, kukaadi bidimu. Nunku mu bwalu abu, bavwa bamba ne mfumu munene kampanda, wa ngiikadilu milenga be . . .Nyewu ngâpù dînà dyende mwoyi, bwa mpindyewu ewu. Ncivwa mwele meeji ne nêngâkulè pa bwalu bwine ebu to. Bwôbò bwine, pâmwâpa mbufwikakaja, kadi budi butulombola ku kantu kadi katupeesha mwaba wa kujaadikila bitudi tujinga kwamba.



Mfumu ewu, uvwa mfumu wa ngiikadilu milenga be, mwikale munange bantu bende be, mu mushindu wa ne, dituku dikwabo, kumpala kwa balami bende ne beena mu bukalenge bwende, kwambaye ne: “Leelu ewu, nudi nummona bwa musangu wenu wa ndekeelu, bwa bidimu byàbûngì.”

<sup>44</sup> Ke balami bende ne beena mu bukalenge bwende kumwambilabo ne: “Mfumu mwîmpè, cyùdì wambila nanku ke cinyi? Uyaaya ku ditunga dya ku baabèndè, mwaba kampanda, bwa kuya kashaala mwenyi anyi?”

<sup>45</sup> Yèyè ne: “To. Ndi nshaala anu mwaba ewu. Ee,” ke yèyè awu, “ndi mpatuka nya munkaci mwa bantu baanyi. Nyaaya kashaala cidime. Nyaaya kakosa mici ne mukoshi wa mici. Nyaaya ka—kadima budimi ne mwenji wa mudimu mukole. Nyaaya kasonza mvinyo pamwe ne aba batu basonza mvinyo. Nyaaya kashaala umwe wabo, bwa mmone mwa kupeta dimanya dîmpè menemene dya bidibo benza. Ndi mubanange. Nenku ndi muswe kubamanya bipite apu, mêmè mwine. Bôbò kabaakumanya to. Kadi, nansha nanku, ndi muswe kubamanya, mu mushindu awu.”

<sup>46</sup> Nenku paakacyabu mu dinda, baaminyampala bende, ne bantu bende bônso, anyi aba bavwa mu nzubu wa bukalenge, paakamumonabo uumusha cifulu cyende cya butumbi uciteeka pa nkwasa, pa nkwasa wa butumbi; ne uvuula muzabi wende, uvwala bilâmbà bya cidime, upatuka uya munkaci mwa bantu beetu baa patupu aba.

Mpindyewu, mu kaabwalu kakese kadibo balonde aku, tudi tusanganamu bwalu bwa Nzambi.

<sup>47</sup> Kwambilabo mfumu awu, ne: “Mfumu, tudi bakuswe. Tudi bakunange. Tudi—tudi baswe ushaale anu mfumu.” Kadi uvwa muswe kushaala umwe wabo, bwa kutambaye kubamanya, bwa bôbò kutamba kumumanya, civwaye mu bulelela. Aci civwa mwa kubaleeja patooke civwaye mu bulelela.

<sup>48</sup> Ke cyakenza Nzambi aci. Yèyè—Yèyè wakaDishintulula, kuumuka ku bu Yehowah Nzambi, bwa kushaala umwe wetu, bwa Yèyè kumona mwa kukenga, bwa Yèyè kumona mwa kulabula lufu, bwa Yèyè kumona mwa kumanya ne kalonda kaa lufu kavwa ncinyi, ne kwambula cibawu cya lufu pambidi pende Yèyè mwine. Yèyè wakateeka ku luseke cifulu Cyende—Cyende cya butumbi ne muzabi Wende, ne wakalwa umwe wetu. Wakoweshangana mâyi ku makàsà ne bantu baa—bantu baa—bantu baa ciipanshi. Wakasombela mu ntenta, ne bapele. Wakalaala mu meetu ne mu misèèsù, ne bavwa kabayi dyeyà. Wakalwa umwe wetu, bwa Yèyè kumona mwa kutamba kutumanya, ne bwa twètù kutamba kuMumanya.

<sup>49</sup> Mpindyewu, ngela meeji, mu cyôci aci, tudi tujandula, dishintuluka, dya Yèyè mwine, cyakenzaYe. Nwènù baswe kumona, Yèyè mmulwe mu dinà dya bânà baa balume basatu.

Wakalwa mu dínà dya Mwânà wa muntu, ne mu Mwânà wa Nzambi, ne Mwânà wa Davidi. Wakalwa bu Mwânà wa muntu.

<sup>50</sup> Mpindyewu, mu Yehezekele 2.3, Yehowah, Yèyè mwine, wakabiikila Yehezekele, muprofeta ne, “mwânà wa muntu.”

<sup>51</sup> *Mwânà wa muntu* udi uswa kwamba ne “muprofeta.” Bivwa bikengela alwe mushindu awu, bwa kuuja Dutelonoma 18.15, muvwa Mòsà mwambe ne: “Mukalenge Nzambi webe neajuule munkaci mwebe muprofeta mufwanangane ne mèmè.” Yèyè kaakaDibiikilaku ne m’Mwânà wa Nzambi to. Wakadyamba Yèyè mwine ne, “Mwânà wa muntu,” bwalu bivwa bikengela Yèyè kulwa bilondeshile Mufundu. Nwamonu anyi? Bivwa bikengela Yèyè kwenza bwa tupese tubidi twa dibeji dipanda atu, ciprofeta cya Dipungila Dikulukulu ne Wende ngiikadilu Yèyè mwine, bwa kwikalabi anu bya mwomumwe menemene. Pa nanku, Yèyè wakalwa, Mwânà wa muntu, mulwe mu awu mmwenekelu.

<sup>52</sup> Pashiishe tudi tusangana ne, paanyima paa lufu Lwende, dijiikibwa, ne dibiika dya ku lufu, Yèyè wakalwa mu Dituku dya Mpenta, bu Mwânà wa Nzambi; Nzambi, Nyuma, mu mmwenekelu awu, Nyuma Mwîmpè. CivwaYe wenza ncinyi? Uvwa uDishintulula, uDimanyisha kudi bantu Bende mu mmwenekelu mushiilangane. Bu mudi, Nyuma Mwîmpè, udi mwikale Nzambi, Wakalwa kukwata mudimu munda mwa bikondo bya ekeleeziya, bu Mwânà wa Nzambi, Nyuma mwîmpè.

<sup>53</sup> Kadi, mu Bukalenge bwa bidimu cinunu, Udi ulwa bu Mwânà wa Davidi, bwa kusomba mu nkwaswa wa butumbi wa Davidi, Mfumu. Bivwa bikengela angate nkwaswa wa butumbi wa Davidi. Udi mu nkwaswa wa butumbi wa Taatu mpindyewu. Ne pashiishe Yèyè wakamba ne: “Ewu wacimuna neasombe Naanyi mu nkwaswa Wanyi wa butumbi, anu Mûndi mucimune ne musombe mu nkwaswa wa butumbi wa Taatu Wanyi.” Pa nanku, Yèyè, mu Bukalenge bwa bidimu cinunu, Yèyè neikale Mwânà wa Davidi. Ncinyi aci? Nzambi umweumwe awu, dîbà dyônsò, mwikale anu ushintulula cibwikilu Cyende cya kwîsù.

Mèmè, bwa mukajaanyi, ndi bayende.

<sup>54</sup> Nukaavwa bamone anyi? Mukaji wa beena Syrophénicie wakamba ne: “Wèwè Mwânà wa Davidi, fwaku luse.” Yèyè, aci kaciyakaMutacishaku to, nansha kakese. Kavwa ne bukenji bwa kuMubiikila nanku to. Kavwa ne bukenji kudiYe bu Mwânà wa Davidi to. Yèyè uvwa . . . Yèyè udi Mwânà wa Davidi, mbwa mwena Yuda. Nenu mpindyewu Yèyè mmulwe . . . Kadi yèyè paakaMubiikilaye ne, “Mukalenge,” Yèyè uvwa Mukalenge wende, ke kupetaye civwaye ulomba aci.

Mpindyewu, bu, Yèyè udi anu uDishintulula.

<sup>55</sup> Mpindyewu, mu dîkù dyanyi, mèmè ndi bantu basatu bashiilangane. Mu dîkù dyanyi, mukajaanyi udi ne bukenji

kùndì bu bayende. Mwanaanyi wa bakaji wawa, kèna ne bukenji kùndì mèmè bu bayende to; ndi tatwèndè. Ne mwikulwanyani mukese wawa, ndi kudiye bu kakwèndè, nenku kèna ne bukenji bwa kumbiikila bu taatu to. Ncyèna tatwèndè to. Mwanaanyi wa balume ke udi tatwèndè. Mèmè ndi kakwèndè. Kadi ndi anu muntu umweumwe awu.

<sup>56</sup> Nenku Nzambi, cidiYe wenza, Udi anu uDishintulula, bwa kudivwija kudi lukongo alu, bwa kuDimanyisha kudi cisamba aci. Nenku ke citudi bavwile mwaba ewu bwa kujandula, diloolo edi. Mmu mushindu kaayi udi Nzambi ne cya kuDimanyisha kudi cisamba eci ne mu cikondo eci? Udi ushintulula cibwikilu Cyende cya kwisù, Udi ushintulula cyenzi Cyende, kadi Kèna ushintulula cilunji Cyende to. Kèna ushintulula ngiikadilu Wende to. Udi ushintulula anu cibwikilu Cyende cya kwisù, uumuka ku eci uya ku cikwabo. Udi ucyenza, bwa kuDibuulula bitooke menemene kudi bantu, bwa bafike ku dimanya ne Yèyè udi nganyi, ne Yèyè udi cinyi.

<sup>57</sup> Mu Ebelu 1, tudi tubala ne: “Nzambi, mu bikondo bya kale ne mu mishindu mishiileshilangane wakaakula ne baataatu, kudi baprofeta, kadi mu matuku a ndekeelu aa kudi Mwànà Wende, Yesu.”

<sup>58</sup> Mpindyewu: “Baprofeta,” mwakamba Yesu, pavwaYe pa buloba apa, “bavwa banzambi. Nudi nubiiikila ‘banzambi,’ aba bavwa Dìyi dya Nzambi dilwa kudibo. Ne Mifundu paayi kayena mwa kunyangakajiiibwa,” mwakambaYe. Yèyè ne: “Mmunyi munudi mwa kuMupiisha pa dîbà adi, padiYe Mwànà wa Nzambi?” Nwamonu anyi?

<sup>59</sup> Dìyi dya Nzambi ndyabanyina cikondo ne cikondo, cidiDi ne cya kwikala. Kadi Yesu uvwa dyula dya biprofeta byònsò. “Munda Mwende muvwa musòmbèle kaabujima kaa Bunzambi mu ciikadilu cya mubidi.” Buvwa munda Mwende. Uvwa n’Yèyè uvwa mu Yozefu awu. Uvwa n’Yèyè uvwa mu Eliya awu. Uvwa n’Yèyè uvwa mu Mòsà awu. Uvwa n’Yèyè uvwa mu Davidi awu, mfumu mubengiibwe.

<sup>60</sup> Cisamba cyende yèyè mwine cyakamubenga, bu mfumu. Nenku paakapatukaye mu—mu bulà, kaamuntu kakwabo, ne bulema kiikale kenda kadikoka, kakayi kaswe bukalenge bwende, ndongolwelu wende, ke kumutwilaku mate. Ke mulami kupatulaye mwele wende mu cimanga, wamba ne: “Nèndekele kabwa aka ne mutu kunshingu, katwila mfumu wanyi mèmè mate anyi?”

<sup>61</sup> Kadi Davidi, pàmwăpa kayi ufika ku dyumvwa civwaye wenza mwine musangu awu aci to, kadi uvwa mwela maanyi. Ke kwambaye ne: “Mulekele. Nzambi ngudi mumwambile bwa kwenzaye cyôci aci.” Ke kubandaye pa kakuna kadi kudilaye Yelusalem, mfumu mubengiibwe.

62 Nukaavwaku bamone anyi? Paanyima paa bidimu nkama ndambu kuumukila piine apu, Mwânà wa Davidi wâkatwilabò mate, mu misèsèsù, wakasanganyibwa pa kakuna apu, mukuna umweumwe awu, mupwekeshe mèsù mutangile Yelusalema, Mfumu mubengiibwe. Wakeela lubila ne: “Yelusalema, mmisangu búngì kaayi ìngààkaswà kukukungwija mudi nzoolo ukungwija twânà twende, kadi wèwè kwakaswa to!”

63 Yèyè katu mushintululeku ngiikadilu Wende to, bwalu Ebelu 13.8 mmwambe ne: “Yèyè udi umweumwe awu makeelela, leelu, too ne kashidi.” Nzambi wakandamuka mubidi, bwa kufwa, kutupikula ku mpekaatu. Ke bwa cinyi WakaDishintulula, bwa kwikala mu—Muntu.

64 Tudi tumona ne, mu Yone Munsantu 12.20, beena Ngelika baakumvwa bwalu Bwende. Mpindyewu, kakwena muntu nansha umwe udi mwa kumvwaku bwalu Bwende mwoyi wende kawuyi mwa kulakuka kapyà bwa kuMumona to. Bu Yobo ne baprofeta baa kale, bavwa bõnsò bajinga kuMumona. Pa nanku, mwena Ngelika ewu wakalwa bwa kuMumona. Kulwabo kudi Filipò, uvwa wa ku Betèsèdà, kwambabo ne: “Mukalenge, tudi baswe kumona Yesu.”

65 Beena Ngelika abu bavwa bajinga kuMumona, kadi kabavwa ne mushindu wa kuMumona to bwalu Uvwa mu ntempelu wa buntu Bwende. “Nzambi uvwa munda mwa Kilisto, upungisha baa pa buloba ne Yèyè mwine.” Mpindyewu tudi tujandula ne, mu cyòcì eci, beena Ngelika aba kabavwa mwa kuMumona to.

66 Kadi monaayi anu mèyì mene akabambila Yesu, paanyima. Wakamba ne: “Lutete lwa blé kaluyi lumate mu buloba, lufwe, ludi lushaala nkaayaalu.” Mu ngakwilu mukwabo, kabavwaku ne mushindu wa kuMumona mu dishintuluka, mu cibwikilu civwaYe muvwale pa dîbà adi aci to, bwalu Uvwa mubwikila mu mubidi wa buntu. Kadi paakamata lutete elu lwa Blé mu buloba, apu Luvwa lutwala bisa byõnsò. Uvwa mutumiibwe kudi beena Yuda, mu bushuwa bwa bwalu, mu cikondo aci. Kadi lutete lwa Blé elu bivwa bikengela lumate; Nzambi mubwikila, mu mubidi wa buntu, musokome beena bupidya, kadi musokolwela beena kwitabuuja.

67 Mu Yone 1: “Ku cibangidilu kwakadi Dîyì, ne Dîyì dyakadi ne Nzambi, ne Dîyì dyakadi Nzambi. Ne Dîyì dyakandamuka mubidi, ne dyàkasõmba munkaci mwetu, ne twâkaMumõna, Mulela umwepele wa Taatu, mûle tente ne ngàsà.” Mpindyewu, ku cibangidilu kwakadi Dîyì. Dîyì mmeeji mapatula patooke.

68 Ku cibangidilu, Kavwa nanshà Nzambi to. Mpindyewu, mwaku wetu wa mu Anglais leelu ewu, *Nzambi*, udi uumvwija ne “cintu kampanda cya dikuukwila.” Mushindu mwine udici ne cibwejakaji mu meeji’s. S’mudi mushindu wa wèwè kuvwija

muntu kampanda kulwaye nzambi. Mudi mushindu wa wêwè kuvwija cintu kampanda kulwaci nzambi.

<sup>69</sup> Kadi mu Dipungila Dikulukulu, mu Genese 1: “Ku cibangidilu *Nzambi*,” mwaku udibo bangate, Elohim. *Elohim* mbwena kwamba ne “Ewu udiku ku Yêyè mwine.” Dishiihangana kaayipu pankaci paa mwaku ewu Elohim, ne mwaku wetu Nzambi. *Elohim* mbwena kwamba ne “Ewu udiku ku Yêyè mwine.”

<sup>70</sup> Twêtù katwena mwa kwikalaku ku twêtù biine to. Katwena mwa kwikala baa bukole bwônsò, baa ngulu yônsò, biikale myaba yônsò, bamanyi baa byônsò to. Elohim awu udi uumvwija byônsò abi. Twêtù katwena mwa kwikala aci to. Muci ûdi uvwija nzambi awu, anyi—anyi nzubu awu, kênàku ku yêyè mwine to.

<sup>71</sup> Pa nanku, Nzambi, ku cibangidilu, uvwa Mwoyi, Wa Cyendeleele. Munda Mwende muvwa byambiiwba, ke byambiiwba abi kwandamukabi Mèyi, ne Dîyi kwandamukadi mubidi. Yesu uvwa Mupikudi. Ne *kupikula*, mbwena kwamba ne, “kwalujulula.” Piikalabi ne Yêyè udi ne cya kucyalujulula, bivwa bikengela cyânji kwikala mwaba kampanda bwa cyôci kumona mwa kwalujuludiiwamu. Pa nanku, nwamonu’s, bantu bônso kabaakufika anu ku dicimona to, bwalu bantu bônso kabavwa ku cibangidilu mu meeji a Nzambi to. Nwamonu anyi?

<sup>72</sup> Tangilaayi baakwidi. PaakaMumonabo uDipatula patooke bilondeshile Dîyi, civwaYe, baakamba ne: “M’Beezezebula.” Aci’s cyakaleeja ngiikadilu wabo ne uvwa penyi. Uvwa mu ngelelu wa meeji wa cyena leelu wa dituku adi.

<sup>73</sup> Kadi kakaji kaa ndumba aku, kaakatuutakeenaYe naaku ku ciibi aku, ne kukambila, kupatula patooke cimanyinu Cyende cya Maasiya, pa kukambila byakenzaku. “Mona’s,” mwakambaku, “Mukalenge, ndi njingulula ne Wêwè ewu udi Muprofeta. Twêtù tudi bamanye ne, Maasiya, paalwaYe, Yêyè ke watwambila maalû ônsò aa.” Kavwa munkaci mwa diMujingulula bu Maasiya, Mulaaba awu, bwalu Yêyè uvwa ukumbanangana ne ngiikadilu ya mu Mifundu. Kanwena numona anyi? [Disangisha didi dyamba ne: “Amen.”—Muf.] Tupese tubidi twa kabeji kubangatu kutwangana. Yêyè ne: “Tudi bamanye aci ne, mpaalwa Maasiya.”

<sup>74</sup> Mpindiewu, bivwa anu mwa kwikala byenzeke ne Nzambi asambakaje *eci* ne *cyacya*, bwa kupeta mwadi wa ngonga wa mushindu kampanda ewu, bu mudi mufwimbi. Kadi paakakudimuka Yesu, wakamba ne: “M’Mêmè udi wakula neebe ewu,” kakwakapatuka dîyi dya bu “Beezezebula” to. Kushiyaye nyingu wende wa mâyi, kubwela mu cimenga lubilu, wamba ne: “Lwâyee, kanumonaayi Muntu Wângambidi bintu bîntu mwenze. Ewu kî n’Yêyè Maasiya mene anyi?” Nwamonu anyi?

<sup>75</sup> Mpindyewu, eci cyakenza cinyi? Paakasambakajaye Mufundu wa kale ne dilabula divwa—divwa Yesu munkaci

mwa kumupa, byakenza cinyi? Byakapatula Maasiya. Nenku nukaavwaku bamone anyi? Ne lukasa lwônsò, mpekaatu yende yakafwidiibwa luse, bwalu, ku cibangidilu, yêyè ukaavwa anu mukumbanyine kupikudiibwa, bwalu uvwa mu meeji a Nzambi ku cibangidilu. Pa nanku, aci kumupikulaci, anyi kumwalujaci, paakamonaye Mufundu mupatula patooke mumweneshiibwe, wa Yehowah, civwaYe, cidiYe.

<sup>76</sup> Mpindyewu, paakalwa Yesu, bu Yêyè mulwe ne mukenji wa Noa, nunku kî mbikumbane to. Kwibaka bwâtù, ne kwenda kulelema, nunku kî mbikumbane to. Kadi Noa awu uvwa citupa cya Nzambi. Wakenza maalu mu mushindu wa pabwawu bwalu yêyè uvwa muntu wa pabwende, ne mukenji wende uvwa wa pabwawu bwalu divwa Dîyì munkaci mwa kumweneshiibwa.

<sup>77</sup> Kavwa mwa kwikala mulwe ne mukenji wa Mòsà to, bwalu nunku kî mbikumbane to. Mòsà uvwa Nzambi, mwikale citupa, mumweneshiibwe. Uvwa Dîyì dipatula patooke bwa dîbà adi, kadi Yesu kavwa mwa kulwa mu aci to. Bible katuku mwambe ne Yêyè uvwa mwa kulwa mu mushindu awu nansha.

<sup>78</sup> Kadi paakalwaYe, Mwambiibwe patooke anu—anu menemene muvwa Dipungila didyanjile kwamba ne Yêyè neambiibwe, pa dîbà adi bônsò bavwa bakumbanyine kupikudiibwa baakitabuujja Cyôci aci, bwalu bavwa meeji a Nzambi. Byambiibwa Byende bya ku cibangidilu, byandamuke mubidi, ne bikumbanyine kupikudiibwa, ne byalujiibwe kudi Nzambi. “Bônsò baakaMwakidila, Yêyè wakabapa bukole bwa kulwabo bânà baa Nzambi,” bwalu bavwa bakumbanyine kupikudiibwa. Bakaavwaku anu ku cibangidilu aku, mu dipatudiibwa dya patooke adi.

<sup>79</sup> Bu twètù mwa kwanji kwimana ndambu mwaba ewu, bu byôbì mwa kwenzeka, bwa kwela meeji pa cyôci aci, diloolo edi, ku Mukenji wa dîbà, meeji mapatula patooke a Yehowah. “Kumpala kwa difuka dya dyulu ne buloba,” mutudi bayiile, “mênà etu akafundiibwa mu Mukanda wa Mwoyi wa Mwânà wa mukooko.” Pa dîbà adi tudi mwa kumona nseke ibidi ayi, bu mûnkaavwà mwambe dyambedi ne, bwa cinyi muntu udi wa pabwende kudi mukwende. Bidi ne cya kwikala mushindu awu. Ke muvwabi misangu yônsò. Ke mutubi mushindu awu misangu yônsò, ne nebiikale mushindu awu misangu yônsò. “Yêyè wakadi Dîyì. Ne Dîyì dyakandamuka mubidi ne dyâkasòmba munkaci mwetu.”

<sup>80</sup> Mpindyewu, Nzambi, mu. . .kale mu matuku a Dipungila Dikulukulu, tudi tusangana ne paanyima paa Yêyè mumane kumwenekela bantu Bende, mu mmwenekelu mishiileshiilangane, Uvwa uDibwikila paanyima paa biseba bya tusengelanshimba. Nzambi usokoma paanyima paa biseba bya tusengelanshimba, ku nkwasà Wende wa ngàsà. Tudi tusangana, mushindu uvwa Solomo, paakalambulaye

ntempelo wa Mukalenge, ne biseba bya tusengelanshimba ebi bivwa bilembeleja muntwamu, cilàmbà cikudika, mushindu wakabwelaYe bu Dikunji dya Kapyà ne bu Ditutu, ne kupwekela paanyima apu, kuDibwikilaye, kudi bantu baa pambelu. Kadi, ku diitabuuja, Izaleela uvwa mumanye ne Yèyè uvwa paanyima apu. Bavwa bamanye ne Yèyè uvwapu, nansha civwa nî nganyi nî nganyi wa mu bampanganu ne cya kwamba ciikale cinyi. Uvwa musokome mwena bupidya. Kadi mwena kwitabuuja, ku diitabuuja, uvwa mumanye ne Yèyè uvwa paanyima apu. Bavwa bapeta luse. Ne Yèyè uvwa pa nkwasà Wende wa ngàsà, civwa ciikale munsokontu munene.

<sup>81</sup> Nudi bamanye, mu Dipungila Dikulukulu, kubwela paanyima paa ciseba aci civwa ndufu. Bwa mpindyewu kushaala kuyi paanyima paaci ndufu. Musangu awu kubwela mu Butumbi Bwende civwa ndufu. Bwa mpindyewu kushaala kule ne Butumbi Bwende ndufu. Aci cyakenzeka, mu bushuwa bwa bwalu, pa dipanda dya cibwikilu ku Kalvariyo, dîbà dyakapandika cilàmbà cikudika, cilàmbà cikudika cya kale aci. Bwa mpindyewu kushaala pambelu paa Bwikadi Bwende ndufu. Musangu awu kubwela mu Bwikadi Bwende civwa ndufu. Nwamonu anyi? Bidi bishintuluka byatwa kumpala byatwa paanyima, nenku bikengela upete Mufundu bwa kumona ne tudi ne mwoyi mu dituku kaayi.

<sup>82</sup> Mpindyewu, paakapandiibwa cibwikilu ku Kalvariyo, nkwasà wa ngàsà wakashala mumweneke patooke menemene. (Kadi cyakenzeka ncinyi? Civwa cikudika ku Kalvariyo, cizololoka Mashi.) Bu mukaavwabo bangatangate mashi, ku cidimu ne ku cidimu, dîbà dya dizezula dya ntempelu ne dimyamina dya mashi pa nkwasà wa ngàsà, mwaba awu, Nzambi, ne dituutu Dyende dinene dikole dya mukenyi wa bukole adi, wakapanda cilàmbà cikudika cya kale cya tusengelanshimba aci kuumukila anu kuulu too ne kwinsi, ke nkwasà wa ngàsà kushalaye mumweneke patooke menemene.

<sup>83</sup> Mwânà wa mukooko mulelela wa Nzambi ne mushuwashuwale, uvwa mulembeleja mumweneke patooke ku Kalvariyo, Nkwasà wa Ngàsà mulelela, paakamana Nzambi kufuta mushinga, Yèyè mwine; ne wakalwa umwe wetu, ne wakaDimwenesha bu Muntu, bwa kufika ku ditumanya, ne bwa twètù kufika ku diMumanya. Nkwasà wa Ngàsà wakashaala mumweneke patooke menemene kudi Izaleela mujima mu dituku adi dya Difuta dya cibawu.

<sup>84</sup> Kadi, bakwetu wanyi, bilele bya baataatu baa ekeleeziya mu dituku adi, ku bilele byabo, bôbò bavwa bajike Nkwasà wa Ngàsà mulelela bamusokoke bantu. Bu bôbò nanshà bamanye Mifundu, nunku kapese kônsò nkaakane anu bu kabeji kaa ba-Chinois aku. Nunku ciprofeta cya Dipungila Dikulukulu ncyûle, ne cyôci ciine cyakuula. Bu nanshà ne bavwa balongeshiibwe Mifundu, nunku mbamone Nkwasà wa Ngàsà. “Bu Môsà,”

mudibo bambe apa, ne, “too ne ku leelu ewu bôbò badi anu ne cibwikilu. Cicidi anu pa myoyi yabo.” Kabeena bamona Cyôci aci to.

<sup>85</sup> Kadi, Yêyè uvwa Nzambi, dikenga ne Difuta dya cibawu. Yêyè ke uvwa Nkwasa wa Ngâsà mulelela uvwa mushaale mumweneke patooke menemene. Bu mutuvwa twimba musambu ewu ne:

Monaayi, Mutangilaayi mumweneke patooke.  
Ke Yêyè wawa, Mucimunyi wa bukole,  
Kacya anu wàpanda cilàmbà cikudika bipese  
bibidi.

<sup>86</sup> Monaayi, wakalwa, Nkwasa wa Ngâsà, mukudika mwikale mumweneke patooke tòò ku mèsù kwa disangisha. Kadi bôbò, bu muvwabo mu mmwenenu wa bantu bônso . . .

<sup>87</sup> Mpindyewu, nwênù balume ne bakaji, ne batumiibwe baa nu cibilu eci, ndi muswe kwamba bwalu ebun nciyi mbwamba nsunguluja muntu to. Kadi, mu kutangila kwa maalu leelu ewu, mu kutangila kwa citudi bavwile mwaba ewu leelu ewu, ndi nciina ne bilele bya baataatu, baataatu baa ekeleeziya, nkwepi kwikalabi bikaadi biCisokoke bantu bapite bungi. Kacya anu Nyuma Mwimpè walwa mu matuku a ndekeelu aa, mukaavwa ciprofeta cyambe, ne cilàmbà cikudika cyapandika, bantu bapitepite bungi badi bakeba kushaala bakulame ku bilele byabo bya baataatu. Nenu ke bwa cinyi kabeena mwa kumona disanka dinenaanaale edi to, ne ditalala, ne bintu bidi Ekeleeziya naabi leelu ewu ebi. Paaci, Cyôci aci ncimweneke anu patooke kumpala kwa aba badi biitabuja.

Yêyè mmusokoke Dîyi, Dîyi dilaya dya dituku edi.

<sup>88</sup> Mpindyewu, bilele mbyenze cibwikilu. Badi bamba ne matuku a bishima akaadi mamane kupita. Muntu mukwabo kwakulaye naanyi, muntu mukalanga wa maalu malenga, mulonge bikole wa mu Tucson, Arizona, mündi musòmbèle amu. Mvwa ngenza disangisha ku Ramada. Nenu tuvwa twakula mu Cibilu cya Beena-Kantu-ku Byanza muvwa Mukalenge Yesu mudivwile kadi kwenza maalu manene. Ke muntu mukalanga mwena Kilisto ewu kulwaye kundi, kwambaye ne. . . Mwambi kampanda wa ekeleeziya, muntu wa maalu malenga, ke yêyè ne: “Mwaneetu Branham, wêwè udi ukeba kufwanyikijila bantu cikondo cya bapostolo,” yêyè ne, “kadi paabi’s cikondo cya bapostolo cikaadi cijike.”

<sup>89</sup> Ke mêmè ne: “Ndi nkulomba, mwaneetu wanyi, undeejuku ne ndibà kaayi didi cikondo cya bapostolo cijike, mu Mifundu.” Mêmè ne: “Cikondo cya bapostolo cyakabanga mu Dituku dya Mpenta, ne cikaadi. . . Peetelo wakamba, mu Dituku dya Mpenta adi ne: ‘Mulayi ewu udi bwenu nwênù, ne bwa bânà beenu balela, ne bwa aba badi kule, mu bungi bwònsò bwikala Mukalenge Nzambi wetu mwa kubiikila abu.’ Cyakajika dîbà



kaayi? Piikalabi ne Nzambi uci di anu ubiikila, nanku's cikondo cya bapostolo cicidi anu mu mudimu.”

<sup>90</sup> Nenku ke mwaba awu udi bantu bateeta kuswika bantu bààbúngì cilàmbà kwísù, ne bilele byabo bya bakulu, bu mwakadibi cikondo aci. Nenku nudi nupanga kumona bwa cinyi bantu badi bambwibwe ne disanka ne basaluke mushindu ewu. Nenku—nenku bibilu ebi mbya pabwabi, cintu cya nkemenu, bwa bantu bakwabo, mbwalu badi bamona ne mbaye dyamwamwa dya mikalu ayi. Mbaye dyamwamwa dya bilàmbà bikudika abi, babwele mu Bwikadi bwa Nzambi, mudibo bamona mulayi mumweneshiibwe wa dîbà edi mwikale mumweneshiibwe kumpala kwa bantu. Badi bamona cyakalaya Nzambi.

<sup>91</sup> Mu Yowele 2.28, Wakalaya, ne: “Mu matuku a ndekeelu aa nekwikale mvula mushiishe *mupongolola* pa bantu, mu matuku a ndekeelu.” Ngela meeji ne mwaku wa cyena Ngelika mwaba awu udi *kenos*, udi uumvwija ne Yêyè wakaDishiya “munda mutupu.” Kabiya mu mushindu utudi twètù bafwanyine kwamba, byenze bu cintu civwa ciikale munda mwa muntu kampanda, cidiYe mupatulule e kushaala munda mutupu. Kadi, Yêyè Mwine ke wâkadipòngolola.

<sup>92</sup> Wakashintuluka; *en morphe* Wende. Yêyè—Yêyè kushintuluka, kuumuka ku civwaYe, kuya ku cidiYe. Yêyè katu ushintululaku ngiikadilu Wende to. Kadi mu Dituku dya Mpenta, Yêyè wakaDishintulula kuumuka ku diikala Mwânà wa muntu, kuya ku Mwânà wa Nzambi. Yêyè wakalwa, kî *nne* bantu to. Yêyè wakalwa *mu* bantu, nwamonu's, Nzambi umweumwe awu, bwa kutungunuka ne mudimu Wende too ne kundekeelu, mu cikondo cinene eci.

<sup>93</sup> Yêyè ukaavwa mwambe ciprofeta mu Bible, ne: “Nekulwe dituku diikala kadiyi nî mmuunya nî mbufuku, kadi ku dîbà dya diloolo nekwikale Bukênkè.” Mpindyewu, dîbà, mu maalu a buloba, ditu dijuukila ku esete ne dikabwela ku wesete. Ndîbà dimwedimwe adi, ku dîbà ne ku dîbà. Mpindyewu, musangu awu, Mwânà, M-w-â-n-à, wakaDibuulula mu dimweneshiibwa dya Dîyi dilaya, kudi Izaleela, bantu baa ku Esete.

<sup>94</sup> Tudi bapete dituku dya mifitu. Tudi bapete bukênkè bukumbane mu balongolodi, ne bikwabo, bwa kwenza maekleeziya ne mangumba, ne kushaala beenamu ne kubwelamu; ne kutwa bâna baa mu maboko mishiku, ne kubenesha mabaka a bakulumpe, ne kujiika bafwe, ne bikwabo; ne kwikala ne mwoyi mu ekeleeziya.

<sup>95</sup> Kadi, ku dîbà dya diloolo: “Nekwikale Bukênkè,” mudiYe mwambe, “ku dîbà dya diloolo.” Ne Mufundu nansha umwe kawena mwa kunyangakajiiibwa nansha. Nenku M-w-â-n-à umweumwe wâkaDipòngolola, *kenos*, mu Dituku dya Mpenta

awu, mmulaye bwa kwenza cintu cimwecimwe aci ku dîbà dya diloolo. Nwamonu anyi? Mbilondeshile mulayi.

<sup>96</sup> Lamakajaayi kabeji aku. Tangilaayi cidi cyenzeka, ne tangilaayi cyakalayaYe, pa dîbà adi nenumone ne tudi penyi. Lamakajaayi cintu aci. Nudi mwa kumona dibuuludiibwa dya munene ne Wa bukole ewu. Bilele mbifomije bantu, cyakabidi, bwa kabamonu bintu binene ebi byakambiibwa mu biprofeta.

<sup>97</sup> Mòsà, paakafumaye ku mukuna, uvwa mukwate Kapyà awu, bulenga bwine budi cifwanyikijilu aci's we!

<sup>98</sup> Mòsà uvwa mumane kupweka mu Ejipitu ne mwambile baataatu baa ekeleeziya ne Mukalenge Nzambi uvwa mumumwenekele mu Dînà dya "NDI." Dînà adi ndîbà dya mpindyewu; kabiya ne "Mvwa; Nèngikalè" to. Kadi, "NDI," umweumwe kashidi, umweumwe awu makeelela, leelu, too ne kashidi. Udi dîbà dya mpindyewu. Yèyè... Aci cidi cikumbanangana ne Ebelu 13.8 ne: "Yesu Kilisto umweumwe awu makeelela, leelu, too ne kashidi."

<sup>99</sup> Cicidi anu Dìyì dyamba mu ciprofeta. Nenu, disangisha, diine divwa ne cya kunwangana ne Dìyì adi adi, dilabula dya dituku edi. Balongolodi bavwa naaci, kaa, kadi edi ndituku dikwabo. Monaayi ne tudi ne mwoyi mu dituku kaayi. Anu bu mudibi ne Yèyè kavwa mwa kulwa, mu matuku akalwaYe pa buloba awu, mu—mu mushindu wakalwa Mòsà, anyi mwakalwa yònsò wa ku baprofeta; aci kî ncivwa cyamba mu ciprofeta to. Kadi mu matuku a ndekeelu aa, cyakalayiibwa ne necilwe mu mushindu ewu. Kacyena mwa kulwa mu mmwenekele wa ditabuluja dya Luther nansha. Kacyena mwa kulwa mu mmwenekele wa ditabuluja dya Wesley nansha. Ndîbà dya dyalujulula. Ncikondo cidici ne cya kwalukila ku Bukènkè bwa ku cibangidilu bwa Mwànà, bwa ku cibangidilu.

<sup>100</sup> Kaa, mushindu mwine utudi bafwanyine kwadija Mifundu, pa bwalu abu's we! Kadi nwènù badi balongele Nzambi mu tulaasa, nansha wèwè mufumine ku citupa kaayi cya buloba, udi mumanye ne Aci ncilelela. Mmulayi. Ke cidi cyenza bantu biikale baa pabwabo mushindu awu. Ke cidi cyenza bimonyamonya, munudi nubabiikila amu. Mbwalu bôbò... cidi... Cibwikilu ncikangudiibwe, buumuke ku bilele, nenu bakaadi bamona Cyôci aci. Yèyè udi umweumwe awu makeelela, leelu, too ne kashidi. Nwamonu anyi? Cidi—cidi mmulayi wa Nzambi, ne katwena mwa kuya bibengangane ne aci to, bwalu Mifundu kayena mwa kunyangakajiibwa to. Eyo. Tudi tusangana ne Yèyè wakacilaya. WakaDishiya munda mutupu e kuDiicikija mu bantu Bende. Ne Yèyè udi umweumwe awu makeelela, leelu, too ne kashidi.

<sup>101</sup> Mòsà, paanyima paa yèyè mumane kupweka mu Ejipitu ne mwambilangane ciine eci, ke pashiishe Taatu kushindika mukenji wende, mu difika pa Mukuna wa Sinaayi, mu Dikunji

dya Kapyà dimwedimwe adi, ne kuvwijaye mukuna awu mukwate Kapyà. Tukaavwaku bamone aci anyi? Yèyè uvwaYe mupe mulayi awu, ke wâkapâtulàYe ne Dîyì. Uvwa ne mikenji. Ne bwa kwikalaye ne mukenji ewu, bivwa bikengela yèyè. . . Mikenji eyi ke ivwa Dîyì. Dîyì kadivwaku dyanji kufika kudi bantu to. Pa nanku, Dîyì didi misangu yònsò dilwa anu kudi muprofeta, ne yèyè ke uvwa muprofeta bwa dîbà adi.

<sup>102</sup> Anu muvwabi ne, Yesu uvwa Dîyì. Yone uvwa muprofeta. Nenku Yesu wakalwa kudiye, mu mâyi, bwalu Dîyì ditu misangu yònsò dilwa anu kudi muprofeta, kadiyi dipangila to. Nwamonu anyi? Dîyì didi dilwa kwòkò aku.

<sup>103</sup> Pa nanku, Mòsà, Dîyì dyakalwa kudiye, mikenji. Nenku yèyè ngwâkayîpeta. Mpindyewu, mbwa cinyi? Kumpala kwa Dîyì kwambiibwadi ne kumweneshiibwadi, bivwa bikengela Mòsà abwikile mpala wende, bwalu Dîyì kadivwa dimweneshiibwe mu kaabujima to. Baakamanya ne cintu kampana civwa cyenzeke, kadi kabayi bamanye ne civwa ncinyi to, mikungulu ayi ne makubakuba. Mu mushindu wa ne, baakamba ne: “Mòsà akule yèyè, Nzambi to.”

<sup>104</sup> Ke Nzambi kwamba ne: “Ee, Nèngènzè nanku. Kubangila ku mpindyewu, Ncyakumweneka kabidi mushindu ewu nansha. Nèmbâtùminè muprofeta. Pa nanku yèyè awu ke wîkala. . . Mêmè nèngìkalè ngakwila mu muprofeta Wanyi.”

<sup>105</sup> Mpindyewu, piikala Mòsà, ne mikenji ya mu bufuki emu, (mudi Pòlò, mu Kolinto Mwibîdi mwaba ewu, mutubuulwile), bikengela kwikalaye mubwikile mpala wende ne cintu cya mu bufuki, cya Nyuma necitambe kwikala cya butumbi mushindu kaayi ne kwikala cibwikila kudi mwena bupidya kumpala kwa kwikalaci cimubuulwila! Mmushindu kaayi udibo bafwanyine kutamba kubiikila. . . Mòsà uvwa cimonyamonya. Kadi wèwè nebatambe kukubiikila munyi, wèwè ukaadi muye dyamwamwa dya cibwikilu ewu, mubwele mu Dikunji dya Kapyà, mupatuke ne Dibenesha! Kadi mpindyewu udi mubwikila. Bantu kabeena mwa kucimona to. Kabeena mwa kuCyumvwa to.

<sup>106</sup> “Piikala cya mu bufuki ciikale cya butumbi, cya citambe mfukilu necitambe kuciikala munyi! Piikala cya mu bufuki, civwà ciikale ne ndekeelu aci, bikengela kwikalaci cya butumbi, Eci cidi kacyi ne ndekeelu eci, necitambe kwikala cya butumbi mushindu kaayi!”

<sup>107</sup> Kadi, nansha nanku, Cicidi cibwikila. KaCyena cibwikila bwa mwena kwitabuuja to, kadi bwa mwena bupidya. Yèyè kèna mwa kuCimona to. Nzambi utu misangu yònsò anu uDibwikila kudi mwena bupidya. Bilele mbiCisokoke. Anu mwakenzabo musangu awu, badi bacyenza leelu ewu.

<sup>108</sup> Civwa ncibwikilu cya mu nyuma citudi naaci mpindyewu, mwaba uvwa cibwikilu cya mu bufuki. Mbishindika kudi

muprofeta mwikale ne Dìyì difunda, mwambi wa ciprofeta, ewu udi ulwa ne Dìyì difunda, bwa kuDivwija ditooke tòò.

<sup>109</sup> Bavwa bamanye ne Dìyì divwaku, kadi kabavwa bamanye ne Divwa dyumvwija cinyi to. Nenku Mòsà wakaDivwija ditooke tòò. Wamba ne: “Mukenji udi wamba *Cikampanda*, ne *cikansanga* mbwa bwalu kampanda.” WakaDivwija ditooke tòò. Kadi kumpala kwa Dyôdi kuvwijiiibwa ditooke tòò, Divwa dibwikila.

<sup>110</sup> Nenku ke mudibi kabidi, leelu ewu, dibwikila kumpala kwa bantu, too ne paabuuludiibwaDi ne divwijiiibwa ditooke tòò kumpala kwa bantu. Nzambi, Nzambi wa bukole awu, mubwikila mu mubidi wa buntu, Dìyì. Monaayi. Mpindyewu tudi tujandula ne civwa cisokoka mwena bupidya, kadi cibuulwila mwena kwitabuuja.

<sup>111</sup> Monaayi, bivwa bikengela ne Mòsà abwele mu Dikunji dya Kapyà edi, nkaayende. Muntu nansha umwe kavwa mwa kuya nende to. Kabivwa. . . cyôci. . . Ciine aci cidi citwambilaku cinyi twètù aba? Ne kwèna ubwela mu Eci pa kudivwija mwena cisumbu cya beena Mpenta to. Nwamonu anyi? Kacya Yèyè kavwaku uCibuulwila bantu musumba to. Uvwa uCibuulwila muntu nkaaya. Nenku ke mudibi leelu ewu. Wèwè udi wamba ne: “Ndi mwena e—ekeleeziya. Ndi—ndi mwena *cikampanda*.” Kadi aci kacyakukumbanaku to. Wamonu anyi?

<sup>112</sup> Nenku muntu pavwaye uteeta kulonda Mòsà, kucitentula, civwa ndufu. Ke mudibi kabidi leelu ewu, lufu lwa mu nyuma, bwa kuteeta kutentula. Ke cidi. . .

<sup>113</sup> Diloolo edi, tudi tubwelamu, kudi kujuuka munkaci mwa bisumbu, didifwanyikija dya mu musunya; muntu uteeta kwenza bu Cyôci aci, kadi mwikale ne nsòmbelu mushiilangane; mwikale mwa kunwa maala, kunwa mfwanka, bakaji biikale mwa kwikala ne nsòmbelu yònsò naka. . . mushindu kana wònsò waswabu awu, mufwanangane ne wa baa pa buloba, bashaala kumbelu bwa kumona télévision, ne bintu bya pa buloba, kadi biikale anu badyamba mudibo beena Mpenta. Badi bateeta kutentula cidi cilelela. Cyôci aci kacitu cyanji kubabuulwilaku to, kacya. PadiCi cibuulula, cidi cya butumbi, nenku cintu kampanda cidi cicipatula munda mwebe paudi ubwela Mwômò amu. Udi ushaala cibwikilu. Cidi. . . Kabyakukumbanaku to. Nenku kuCitentula kuvwa ndufu.

<sup>114</sup> Cibwikilu cya Mòsà; yèyè uvwa Dìyì diikale ne mwoyi bwa cisamba. Ne leelu ewu, bantu badi babwikila badi cintu cimwecimwe aci. “Badi mikanda mifundilangana, mibala kudi bantu bònsò.” Kawuyi mukanda mufundilangana *mupyamupya* to; kadi Mukanda mufundilangana ùkaadì mumana kufunda, mumweneshiibwe. Ng’aba—ng’aba badi biitabuuja Dìyì ne mulayi wa dituku edi, ke badi Nzambi upongolwela Nyuma Wende, pa musunya wònsò, ne bôbò abu ke badi mikanda

mifundilangana ayi. Kadi padi muntu uteeta kutentula aci mu musunya, cidi cimukudimukila yêyè. Nsòmbelu webe ngudi uleeja cyûdi.

115 Musangu kampanda kuvwa nsongalume mukwabo, uvwa mupeteke ne lutatu kampanda. Uvwa nsongalume mwîmpè, kadi kupitaye—kupitaye ku tubadi. Ke nzuji kwamba ne: “Ndi nsangana ne udi mupiile. Ndi ne cya kukukosela cibawu cya buloko bwa kashidi.”

116 Awu ne: “Ndi muswe kudilumbulwila cilumbu cyanyi.” Yêyè ne: “Ndi muswe kucishindamijila pa byenzedi byanyi.”

117 Yêyè ne: “Wêwè kwêna ne byenzedi biine to. Byenzedi byebe’s ki bidi bikupishe ebi.”

118 Nenu mushindu awu ke udibi leelu ewu, kabingila kadi kenza ne ekeleeziya kî mmuye kumpala bu muvwabi bikengela to. S’mbujaadiki. S’nsòmbelu. Tudi ne cya kutamba kwikala badilambule. Tudi ne cya kwitabuuja Dîyi dyônsò dya Nzambi. Tudi ne cya kwikala takebulula too ne padi Dîyi diine adi divwijibwa dilelela kutudi. Nwamonu anyi? Nwamonu anyi? Bujaadiki ke budi butupangisha bwa kubwela.

119 Kadi, musangu kampanda, (bwa kunupa mushindu wa kusuuluka mu dijita edi), ku tubadi tumwetumwe etu, nsongalume ewu kavwa ne mfranga to. Kavwa ne mushindu wa kufuta cibawu to. Cibawu civwa cya binunu ne binunu bya ndola. Kadi uvwa ne tûütwêndè wâkalwa kumufucilaci.

120 Mpindyewu, tudi peetu ne Tûütwêtu, Yesu, Mwânà wa Nzambi. Nenu Yêyè ke wâkalwa kutufucilaci, bu twêtu anu mwa kuciitabuuja ne bakumbane kubwela Nende munda mwa cibwikilu amu. Byenze bu ne, Yêyè ke wetu Môsà. Yesu ke wetu Môsà wa leelu ewu. Môsà, mubwikila, yêyè ke uvwa Dîyi divwa ne mwoyi bwa cisamba. Leelu ewu, Yesu, mubwikila, ke udi Dîyi didi ne mwoyi bwa cisamba, mumwe ne, Yesu mu Ekeleeziya. Nyuma Mwîmpè, Mwânà wa Nzambi munda mwa bantu, mwikale ubuulula Dîyi ku mulayi wa dituku edi, wenza Cyôci aci anu menemene. Ncintu cimwecimwe aci mpindyewu.

121 Nenu vulukaayi ne, Môsà wakenza cyôci eci, ne wakamwenesha cyôci eci, kakuyi kudi baa pa buloba bujima to, kadi kudi cisamba civwa mu cimwangi, anu kasumbu kamwe kaa bantu, bavwa ng’aba bavwa bapatuke mu cimwang- . . . mu cimwangi.

122 Nenu leelu ewu, Nyuma Mwîmpè, kumpala kwa bantu badi bamba ne: “Dyondopa dya kudi Nzambi kî ndya cya bushuwa to.” Pâmvwà nkebulula . . .

123 Ngangabuka mukwabo kumbiikilaye, dîngà dituku, bwa nsongakaji mutekete, kaa, kuvwa babeedi banaayi anyi bataanu kuntwaku, biikale anu bapûnga ne lufu, babapa mêbà, kadi Nyuma Mwîmpè kubondopa. Ngangabuka uvwa ucyela mpatà.

Yèyè ne: “Ebu bwalu budi mwa kwenzeka bishi? Mona’s,” ke yèyè awu, “Mêmè—mêmè. . . Awu’s mmubeedi wanyi.”

<sup>124</sup> Mêmè ne: “Uvwa webe. Kadi bwa mpindyewu ukaavwa wa Nzambi. Ukaadi—ukaadi, ukaadi muntu Wende mpindyewu.” Nwamonu anyi?

<sup>125</sup> Nenku nudi numona cintu cidiku, ncyà ne Nzambi udi ubiikila cimwangi, bwa kuumuka paanyima paa ridô wa musunya udi uteeta bwa kutentula awu, udi uteeta bwa kudivwija mwena ekeleeziya awu; kî ng’anu ba-Méthodistes, ba-Baptistes, ba-Presbytériens to, kadi ekeleeziya ya cyena Mpenta. Bwalu mbwa muntu nkaaya. Ngwêwè ne Nzambi. Bikengela ubwele, kî ncisumbu cyenu, kî ng’ekeleeziya wenu, kî mmpaasata wenu to, kadi udi ne cya kubwela ngwêwè.

<sup>126</sup> Ndi muswe bwa nwênù kumona ngiikadilu mukwabo wa Mòsà, paakatukaye. Nansha muvwabi ne, uvwa muprofeta, mwikale muntu munene muvwaye amu, paakatukaye ne Dìyì, bantu baakamona ne uvwa mushintuluke. Cintu kampanda civwa cimwenzekele. Paakatukaye ne Dìyì dishindika dya dîbà adi, mikenji ayi, uvwa muntu mushintuluke.

<sup>127</sup> Ke muwikala peebe, pawikala muumuke paanyima paa cibwikilu cya buntu aci cidi cifwanyine kuseka disangisha bu edi; muntu awu udi mufwanyine kulendwishiibwa bwa dyondopa dya kudi Nzambi, ne kwamba ne matuku a bishima akaadi mapite. Wâmanyi kumacisha cibwikilu cya buntu aci paanyima, cibwikilu cya bilele, nenku muntu yònsò neamanye ne cintu kampanda ncikwenzekele.

<sup>128</sup> Byenze bu mwaneetu wa kuneemekiibwa, Jim Brown. Ndi ndifwanyikijila ne ciibûngì cya ba-Presbytériens mbamanye ne cintu kampanda civwa cimwenzekele, bwalu uvwa—uvwa muumuke paanyima paa cibwikilu cya bilele. Wakamona cintu kampanda mu bantu, cyakamukoka, ke kuumukaye paanyima paa cibwikilu aci.

<sup>129</sup> Ee, wêwè, paudi umuka paanyima paa cibwikilu, dîbà adi ke pawikala patooke kumpala kwa mèsù a bantu, bwa kufikabo ku dimona ne cintu kampanda ncikwenzekele. Dìyì dibwikila, bwa mwena bupidya, kadi diikale patooke ku mèsù a mwena kwitabuuja. “Yesu Kilisto umweumwe awu makeelela, leelu, too ne kashidi.”

<sup>130</sup> Musangu awu, civwa n’Nzambi. Mu matuku awu, civwa n’Nzambi mu Muntu, Mwânà Wende, Yesu Kilisto. Tudi twitabuuja aci. Kaciyi anu muprofeta cyanaana to, kaciyi anu muntu wetu wa patupu ewu to, muntu wa patupu ewu. Civwa n’Nzambi mu Kilisto; Nzambi mu Muntu; kaabujima kaa Bunzambi, mu ciikadilu cya mubidi mu Muntu. Nzambi mu Muntu!

<sup>131</sup> Bwa mpindyewu n’Nzambi mu bantu, kaabujima kaa Nzambi mu Bunzambi, mu ciikadilu cya mubidi mu Ekeleeziya

Wende mujima, mwikale udimwenesha Yèyè mwine, mwikale uuja Diyì Dyende.

<sup>132</sup> Mpindyewu tudi tusangana, Nzambi, mu bikondo byònsò ne, Úvwa anu ne dikoba pambidi. Yèyè, Nzambi, utu musokoka paanyima paa cibwikilu.

<sup>133</sup> Nyewu cifuma ku dimvulwija kaa—kaabwalu kakwabo kakese kavwabo balonde kavwa kenzeke mu Sud. Nenu kuvwa dîkù kampanda dya beena Kilisto. Nenu musangu awu mu dîkù dya beena Kilisto edi bavwa biitabuuje Nzambi, ne bavwa—bavwa beela meeji ne—ne Nzambi uvwa ubakuba ku ntatu yònsò. Ne, mwomu ne, Yèyè utu ukuba. Nenu bavwa ne ka-Junior, kânà kaa balume kaa bidimu bu mwandamutekete anyi mwandamukulu nanku awu. Nenu—nenu kavwa kaya mu kalaasa kaa Dyalumingu kadi kiikale kânà kakese kalenga maalu be. Kadi kavwa ne bwôwà bwa mvula wa cipupu, nangananga pavwa mikenyi yela.

<sup>134</sup> Nenu mvwa mucilondele muntu mukwabo, dîngà dituku, pavwa bwalu abu bupatuke bamba bwa muntu ewu ne uvwa mwondopiibwe. Mwambi umweumwe ewu kwambaye ne: “Badi bakuvwija nzambi, Mwaneetu Branham.”

<sup>135</sup> Ee, yèyè uvwa mwena kadyuwu, ke mèmè kudyambidila anu ne mbipiciibwe ne mèmè mwimanyike dyakula, kakese cyanaana. Kabiya bwa kumutapa ku mwoyi to, nudi bamanye, kadi anu mu mushindu wa . . . Mèmè ne: “Aci cidì kule menemene ne Mufundu anyi, bwa kwikala cyôci aci?” Nwamonu anyi? Mèmè ne: “To, kacyna kule to,” mûngàakambà, “bwalu Yesu’s nyawu wakabiikila baprofeta ne ‘mbanzambi.’ Wamonu anyi? Aci mmu cyôci, ‘Nzambi.’”

<sup>136</sup> Nenu badi bamba ne: “Nwênù bantu nudi nukeba kwangata kaaba kaa Nzambi.” Aci kî ncitambe kwikala ku luseke to. Ncyôci anu menemene. Ke mudici menemene. Nzambi mumweneshiibwe mu mubidi, anu mwakalayaYe.

<sup>137</sup> Kaafamiye kakese aka, mutwákàsangànyì. Mèmè kadi kumulondela kaabwalu aku, kadi kamvwile mu meeji anu mpindyewu mene. Nenu, kulwaku mvula wa cipupu diloolo kampanda, ke maamu kwambila Junior, ne: “Mpindyewu, bandaaku ku nzubu wa kuulu, mwanaanyi, ukalaale.”

Awu ne: “Maman, ndi muumvwe bwôwà,” mwakambaye.

“Kakwena cintu cyakwenzela bibi to. Banda nda kalaala.”

<sup>138</sup> Ka-Junior aku e kudyololaku kuulu aku, mikenyi kadi kubanga kwela ku nyungulukilu wa madidiishi aku. Ke kalumyana kubindulukaku bikole, mu mushindu wa ne kaakabweja katù kàakù aku mu mbulankete, kadi katungunuke anu ne kuumvwa mi—mikenyi ayi, anyi kumona muvwa mikenyi yela lwa ku madidiishi aku, ne—ne kuumvwa makubakuba muvwawu atuuta. Ke yèyè ne: “Maman!”

Ke awu ne: “Udi ukeba cinyi’s, Junior?”

Yèyè ne: “Banda kuneeku ulwe kulaala pamwe naanyi.”

<sup>139</sup> Ke kubandaye bibandilu abi, mudi maamu mwimpè ne wa lulamatu, mufwanyine kwenza amu. Ke kubandaye, kwangata ka-Junior mu maboko ende. Ke yèyè ne: “Junior, maawu udi ne dijinga dya kuyiikilanganaku neebe ndambu.”

Yèyè ne: “Eyo, maman.”

<sup>140</sup> Yèyè ne: “Mpindyewu kupu mwoyi bwalu ebu to. Tutu tuya mu ekeleeziya, ku musangu ne ku musangu. Tutu tubala Bible. Tutu tusambila. Tudi famiye wa beena Kilisto. Tudi biitabuuje Nzambi.” Ke yèyè ne: “Tutu twitabuuja ne, mu mvula ya bipupu ne byònsò bitu byenzeka, Nzambi ke dyetu dikubiibwa.”

<sup>141</sup> Yèyè ne: “Maman, ndi ngitabuuja kantu ne kantu kaa byôbì abi. Kadi,” ke yèyè awu, “pakaadi mukenyi awu useemena menemene,” yèyè ne, “mêmè—mêmè ndi muswe Nzambi mwikale ne dikoba pambidi.”

<sup>142</sup> Pa nanku, mêmè—mêmè ndi ngela meeji, kî ng’anu Junior to, twêtù bònsò tutu tuumvwa nanku awu. Patudi tudisangisha, patudi tusambidilangana ewu ne ewu, Nzambi mwikale ne dikoba pambidi.

<sup>143</sup> Nenku tudi tujandula mwaba ewu ne Nzambi utu misangu yònsò anu ne dikoba pambidi Pende. PaakaMumona Mòsà, Uvwa ne dikoba pambidi Pende, mufwanangane ne Muntu. Pavwa Nzambi paanyima paa ma-rìdô, Uvwa ne dikoba pambidi Pende. Ne Nzambi, diloolo edi, mu Ekeleeziya Wende, mmubwikila mu Ekeleeziya Wende ne dikoba pambidi. Ucidi anu Nzambi umweumwe awu, diloolo edi. Ke citudi tusangana ncyaci.

<sup>144</sup> Kadi mpindyewu, anu bu kwònsò eku, cibwikilu cya dikoba aci ke cidi cijike bilele. Bòbò kabeena anu mwa kwitabuuja ne Nzambi ngudi ufikisha bantu abu ku dyenza maalu mushindu awu to. Nwamonu anyi? Mbwalu Nzambi mmubwikila mu Ekeleeziya Wende, mu dikoba, dikoba pambidi. Ncy bushuwa. Yèyè mmusokoka mwena bupidya, kadi mubuwila mwena kwitabuuja. Eyowa’s, mukalenge.

<sup>145</sup> Mpindyewu, padi cibwikilu cyabo cya bilele, cya bilele bya bakulu ne Dìyì, ciikale cipandika too ne mwamwa, kaa, mu bushuwa bwa bwalu, leelu ewu, nenku bimweneke patooke, tudi tuMumona, Bunzambi cyakabidi bubwikila mu mubidi wa buntu. Ke mudi Ebelu 1 mwambe.

<sup>146</sup> Ne Genese 18 kabidi. Nudi bavuluke ne, Nzambi uvwa m’Muntu, mwimane mwaba awu, udya, ne uyiikila ne Abraham, ne wamba bivwa Sarah wenza mu ntenta paanyima paa Cyôci aci.

<sup>147</sup> Nenku Yesu wakamba ne: “Anu mwakadibi mu matuku a Sodoma, ke mwikalabi kabidi ku Dilwa dya Mwànà wa muntu.” Bunzambi bubwikila cyakabidi mu mubidi wa buntu!



Mpindyewu, nwavulukaayi, Yesu kaakamba ne: “Piikala Mwânà wa Nzambi mwa kubuuludiibwa” to. Mu Luuka nshapita wa 17, ngela meeji, lwa ku mvensa wa 20, wa 21, lwa mwaba kampanda mwaba awu, Yèyè mmwambe ne: “Nenku piikala Mwânà wa muntu mwa kubuuludiibwa.” Mwânà wa muntu, mwalukile cyakabidi mu—mu—mu Ekeleeziya, mubuuludiibwe mu bantu; kî m’Mwânà wa Nzambi to, kadi Mwânà wa muntu cyakabidi, mwalukile cyakabidi mu Ekeleeziya Wende, mu matuku a ndekeelu. Tudi tusangana ne Yèyè ngwâkalaya aci mu milayi ya Nzambi.

148 Nyewu tumona cikwabo cintu, mu Dipungila Dikulukulu. Ndi ne Mufundu awu mwaba ewu, mu Ekesoode. Ne, biseba bya kale bya tusengelanshimba abi, bivwa byenza cinyi? Bivwa bisokoka bantu Butumbi bwa Nzambi. Biseba bya tusengelanshimba; nansha bantu biine kabavwa mwa kuBumona to, bwalu ciseba ncivwa ciBujike. Ciseba civwa... Butumbi bwa Nzambi buvwa paanyima paa ciseba.

149 Kadi mpindyewu Butumbi bwa Nzambi budi paanyima paa dikoba dyebe wêwè. Ncya bushuwa. Ne bilele kabyena biBumona to. Budi munda mwa cibwikilu, mwaba uvwa Dîyi Dyende disanganyiibwa.

150 Ncinyi civwa munda mwa ciseba aci paanyima apu, biseba bya kale bya tusengelanshimba abi?

151 Bivwa ne: “Kakuvwa bulenga butuvwa mwa kujingila Cyôci aci to. Ne paakandamukaCi mubidi ne kusomba munkaci mwetu, kaCivwa anu ne bulenga bwa twètù kuCijingila to.”

152 Nenku mpindyewu cintu cimwecimwe aci ke cidiku leelu ewu. Kakwena cintu mu mulume anyi mu mukaji, cidibo mwa kujinga to. Ncidi paanyima apu. Ke cyôci aci. “Ee,” mûdi wamba, “mulumyana wawa, mêmè ndi mumanye ne uvwa mukwaciki wa maala. Uvwa ne ciibidilu cya kwenza *cikampanda*.” Civwaye ne ciibidilu cya kwenza nansha ciikale cinyi. Cidi cisokoka paanyima paa dikoba adi ncinyi? Cidi paanyima apu, ke cidi ne mushinga. Ke bwa cinyi, bantu mbafofomija. Dikoba ndidi difofomija bantu. Nwamonu anyi? Bôbò badi bamba ne: “Mêmè ndi muvuluke pavwa mukaji wawa ne ciibidilu aci.” Ndi mumanye bivwaye ne ciibidilu cya kwenza, kadi bishi bwa mpindyewu? Nwamonu anyi?

153 Biseba abi, bivwa musangu kampanda pambidi pa kasengelanshimba, kadi leelu ewu cikaadi cisokoka Butumbi bwa Nzambi, cikaadi cishaale nzubu wa bwine Butumbi abu paanyima paaci. Civwa pambidi paa nyama, kadi mpindyewu cikaadi cishaale nzubu wa Butumbi bwa Nzambi.

154 Bya mwomumwe dyebe dikoba paadi didi mwa kushintuluka, diloolo edi, bwa kuvwijiihwadi nzubu wa cisòmbedi bwa Nzambi, Nzambi usòmbela mu buntu.

<sup>155</sup> Tangilaayi. Biseba bya kale bya tusengelanshimba abi, nyawu tujandula ne, paanyima pavwa...Munda amu muvwa Dîyi. Nenku, Dîyi, muvwa kabidi mâmpà a baakwidi. Musheete wa cipungidi uvwa mummyamina mashi. Nenku civwa ncinyi? Butumbi bwa Shekinah ke buvwa muntwamu.

<sup>156</sup> Mpindyewu, Dîyi n'Dimiinu, ne Dyôdi kadyena mwa kuvulangana padiD-...Mwânà kayi muDilenge to. Bikengela Mwânà alwe pa Dimiinu, bwa kuDikwamisha, bwa kuDifikisha ku divulangana. Ne ke mushindu umwepele awu. Udi wangata Dîyi, wamonu's, udi wangata Dîyi dya Nzambi munda mwa mwoyi webe, ne ubwela mu Butumbi bwa Shekinah. Ne paudi wenza nanku, neDitwale dyâmpà dya baakwidi, Manà, àtù mafidiibwe anu bwa cisamba cidi citapuluke. Cintu cimwepele cidi mwa kudidya, cidi ne dyanyisha dya kudidya, anu bantu badi baanyishiibwe ne badi baDimanye. Pòlò mmwambe apa ne: "Kushintuluka kuumuka ku Butumbi kuya ku Butumbi." Nudi numona's, ndekeelu wa byônsò, Didi dikafika too ne ku Dyôdi kwalukila ku Butumbi bwaDi bwa ku cibangidilu.

<sup>157</sup> Ndyenze anu bu dimiinu dya butumbi bwa mu dinda. Dimiinu dya cilôngò, didi dimata mu buloba. Dimiinu dya ditala didi dimata mu buloba. Cintu cya kumpala ncintu kaayi? Didi ditoloka, ne didi dilwa kabeji kakese. Pashiishe kadi kaya too ne ku mwepu. Pashiishe, dyumuka ku mwepu, dyalukila cyakabidi ku lutete lwadi lwa ku cibangidilu.

<sup>158</sup> Ee, ke cyôci aci menemene cidi Ekeleeziya mwenze. Yêyè mmumukile ku Luther, Wesley, nenku mwalukile mpindyewu ku Lutete lwa ku cibangidilu, mwalukile ku Butumbi Bwende bwa ku cibangidilu, mwalukile ku Butumbi buvwaYe naabu ku cibangidilu. Mwânà wâkajuuka ku Esete, m'Mwânà anu umweumwe awu udi munkaci mwa kumwenesha cintu cimwecimwe aci ku Wesete, ushintuluka uumuka ku Butumbi uya ku Butumbi. Lwakashintuluka kuumuka ku bumpanganu, kupweka e kubwela mu Luther; ne kuumuka mu Luther, kupweka e kubwela mu Wesley; kuumuka mu Wesley, kupatuka e kubwela mu Mpenta; anu nanku anu nanku, ushintuluka uumuka ku Butumbi uya ku Butumbi, upatula Manà masokoka.

<sup>159</sup> Kadi mpindyewu Lukaadi lubobe, bwa kuMupingaja anu menemene muvwaYe ku cibangidilu, mudimu Wende wa bwambi umweumwe awu; Yesu umweumwe awu, bukole bumwebumwe abu, Nyuma Mwîmpè umweumwe awu. Anu Yêyè umweumwe wâkapweka mu Dituku dya Mpenta awu, n'Nyuma Mwîmpè umweumwe awu udi mumweneshiibwe leelu ewu, uumuka ku Butumbi uya ku Butumbi, ku Butumbi. Nenku ukaadi mwalukile ku Dimiinu Dyende dya ku cibangidilu, ne dibatiiza dya Nyuma Mwîmpè; ne bimanyinu bimwebimwe abi, maalu a kukema amweamwe awu, dibatiiza dimwedimwe adi; bantu baa mushindu umweumwe awu, benza maalu mushindu umweumwe awu, biikale ne bukole bumwebumwe abu, disaluka

dimwedimwe adi. M’Muumuke ku Butumbi muye ku Butumbi. Ne cyalonda ciikalaku ncyà ne: “Bashintuluke buumuke ku ebu Butumbi, babwele mu mubidi mufwanangane ne mubidi Wende Yèyè mwine wa butumbi, mutwaMumwena.” Abraham wakamona cimwecimwe aci.

<sup>160</sup> Mpindyewu monaayi. Tudi tumona mwakashintulukabi. Kubangila ku Kalvariyo, tudi babiikidiibwe bwa twikale baabanyanganyi baa Butumbi Bwende. Mpindyewu, mu Kolinto wa Kumpala 12: “Tudi babatijiibwe mu Mubidi Wende. Ku Nyuma umwe nkutudi bõnsò babatijiibwe.” Kabiya ku “mâyi” amwe to. “Ku Nyuma umwe, nkutudi bõnsò babatijiibwe.” Aci ncyà bushuwa, mpindyewu, ne pashiishe tulwa citupa Cyende.

<sup>161</sup> Ndi ntekemena ne ncyèna nnulama mukùngùlù mupitepite bule to. [Disangisha didi dyamba ne: “To.”—Muf.] Nwamonu anyi? Ndi ntekemena ne kî nnanku to.

<sup>162</sup> Kadi, mbyenze anu bu dinwangana dinene dya mijiki ayi miikale yimba anu kwimba, anyi dyanza dya dinaya.

<sup>163</sup> Ncitu mutambe kumanya pa bidi bitangila dinwangana dya mijiki anyi manaya to. Kadi mvwa mbandila dinaya edi . . . Mvwa ngakula bwa *Carmen*, pavwa mwanaanyi wa bakaji ne bakwabo biikalemu. Nenku bavwa—nenku bavwa bimba mu dinwangana dya mijiki diine edi, mu *Carmen*. Bavwa benza dinaya. Mujiki awu uvwa—uvwa—uvwa wenza anu cintu cimwecimwe aci.

<sup>164</sup> Ke mushindu udibi paudi mubatijiibwe ne Nyuma Mwîmpè, mu Kilisto.

<sup>165</sup> Mpindyewu, monaayi, bààbûngì beenu bakaadi babale anyi bumvwe balonda bwalu bwa musaki munene wa misambu wa beena Russie wâkasàka musambu wa *Pierre Nè Mbwa Wa Diitu*. Ne mushindu mwine udiye, udibo benza dinaya adi biikale bimba ne byamu bya kukumakaja naabi ne bikwabo byõnsò. Nenku muntu kana yõnsò utu mumanye bwalu budibo balondemu abu, ùbùbala pa mabeji, ne mumanye mwa kuumvwa dinwangana dya mijiki adi, mushindu udibi byenza ciine aci, dinaya adi, biikale badinaya, mona’s, bõbò mbamanye nshintulukilu yõnsò. Bõbò badi mwa kucitangila *apa*, kumona nshintulukilu awu.

<sup>166</sup> Kadi, mpindyewu, cidi cyenzeka ncinganyi padi musaki wa musambu ufunda cintu kampanda, kadi twètù tusangana ne kî mbinayibwe mu byòbì? Tudi tujandula pa dîbà adi ne kudi cintu kampanda cidi cyenzeka. Kudi kupangika cintu kampanda, patudi tubamona. Yèyè uvwa muwusake awu ke udi muwènzè ne udi muwufunde, nenku pashiishe dinwangana dya mijiki didi dicyenza mu dinaya, batuuta mbota wa cyanaana. Kudi cintu kampanda kaciya mu cyòci to. Mulombodi mmuleeje ne cyanza dîyi dya mujiki didi kadiyi dyòdi to. Nwamonu anyi?

<sup>167</sup> Nenku ke lutatu ludiku leelu ewu ndwòlò alu, nwènù bàna beetu ba-Luthériens, nwènù bàna beetu ba-Baptistes, nwènù

bânà beetu beena Mpenta. Bânà beetu bônso baa mu mangumba mashiileshiilangane, ke cyôci aci. Nwamonu anyi? Nudi nuteeta kufila cikemu cidi cituuta cyalujangana mu matuku a Luther, Wesley, mushindu awu, padibi ne, mu bushuwa bwa bwalu, Dibeji dya mujiki mwaba ewu didi dileeja ne ndituku dya patupu. Nwamonu anyi? Nwamonu anyi? Nwamonu anyi? Twêtù katwena mwa kwikala ne mwoyi mu bukênkè bwa Luther nansha; yêyè uvwa mulongolodi. Tudi twanyisha wende—wende mudimu wakenzaye, kadi's tukaadi bamane kuwena. Tukaadi lwa *apa* paanyima paa Mukanda mpindyewu. Nwamonu anyi? Katwena mwa—katwena mwa kuCinaya mushindu awu to.

<sup>168</sup> Mpindyewu, mushindu umwepele unwikalaku mwa kwenza aci, bânà beetu, ngwôwò ewu. Nenu nwênù bânà beetu baa buloba bujima, baa mu bitupa bishiileshiilangane bya buloba, ndi mufwanyine kwamba ne, kudi mushindu anu umwepele udi—udi mulombodi awu mwa kwenza. Bikengela abwele mu Nyuma umwèumwè muvwa musaki wa musambu usanganyiibwa amu, pa dîbà adi yêyè wapeci Cyôci aci. Nenu padi Ekeleeziya, dinwangana dya mijiki Dyôdi diine, pàdi baa pa buloba bindile bwa kumona bimanyinu ebi ne maalu a kukema; padi Ekeleeziya, ne Musaki wa musambu, ne mulombodi, bônso babwela mu Nyuma wa Musaki wa musambu.

<sup>169</sup> Nenu padibo bamba ne: “Matuku a bishima akaadi mapite,” aci kacyena cifila dîyì dya musambu mu dyôdi to.

<sup>170</sup> Kadi padibi bibwela mu cyona cya bushuwa cya Cyôci aci, ne Nyuma wa bushuwa wa Cyôci aci; nenwênzè ciine aci bishi piikala Nyuma kayi mutuuluke, wa Musaki wa musambu awu? Amen. Kadi paudi wamba ne: “Matuku a bishima kî mmapiteku to,” dinwangana dya mijiki's nedyèlè lubila lukole ne: “Amen!” Patudi tutuuta, twamba ne: “Yesu Kilisto umweumwe awu makelela, leelu, too ne kashidi,” dinwangana dya mijiki's nedyèlè lubila lukole ne: “Amen!” “Nenupete bukole paanyima paa Nyuma Mwîmpè mumane kunutuulukila.” Dinwangana dya mijiki's nedyèlè lubila lukole ne: “Amen! Mêmè ndi muMupete!” Kakucyena kabidi pa dîbà adi bya difwikakaja pa bwalu abu to. Dinwangana dya mijiki dyônso nkòong didi anu mu dyumvwangana ne Dîyì. Nediikale. . . [Mwaneetu Branham udi utuutakaja byanza misangu isatu—Muf.] Ke cyôci aci. Kaa! Cintu's ncyà butumbi. Mulombodi ne Musaki wa musambu badi ne cya kwikala mu Nyuma wa mwomumwe. Nansha bimbi baa bisanji kabidi badi ne cya kwikala mu Nyuma wa mwomumwe awu, bwa kuCinaya cyônso. Kadi baa pa buloba badi munkaci mwa kudikonka ne cidi cipitakana ncinyi.

<sup>171</sup> Communisme udibo anu bamba ewu, kumba kunsamisha mutu ne biine bintu abi, ne maalu ônsò a dibwelakaja dya bantu awu ne bikwabo byônso, ne bya disungulujangana ebi. Kaa, luse we! Bya nanku awu, mu lukutukutu lwônso elu, padi Dilwa dya Mukalenge diikale pabwîpi, kudi cintu kampanda

cituuta mu mushindu udi kawuyi mu wôwò to. Ndi nciina ne nkwepi kwikala mulombodi ukaadi mupatuke. . . Balombodi mbapatuke mu Nyuma wa Musaki wa musambu.

172 Patudi tupeta Nyuma awu wa Musaki wa musambu, bukole bwa ku cibangidilu bwa Nzambi abu bwakambà Bible ne: “Bantu baa kale baakasakiiibwa kudi Nyuma Mwîmpè bwa kufunda Bible ewu” abu, nenumone ne tupese tubidi twa kabiji kaa ba-Chinois atu netutwangane, anu mudi Bible wa Nzambi ne mwena kwitabuuja batwangana, bwalu bônso babidi badi mu Nyuma umwe. Bubidi bwabo badi cintu cimwe. Badi banwangana anu menemene. Cidi citukengela twètù aba leelu ewu mbalombodi, ncyá bushuwa, baalukila ku Dîyî, baalukila ne baDiiitabuuja anu mudiDi dyambiibwe. Pa dîbà adi nudi numona Nzambi awu, Yèyè mwine. Ke dibuululudiibwa ndyôdi adi. Dinaya divwijiibwa dya cya bushuwa.

173 Leelu ewu, badi bamba ne: “Ee, Yèyè’s n’Nzambi wa bwalu bulonda. Tudi bamanye ne Yèyè wakakosolola Mbû Mukunze. Wakenza *bikampanda* byônso. Ne Yèyè uvwa mu—mu cikutu cya kapyá, ne bânà baa beena Ebelu.” Nzambi wa bwalu bulonda udi ne mushinga ku cinyi, piikalabi kayi, piikalabi ne Yèyè kêna umweumwe awu leelu ewu? Muntu utu anu watumbisha Nzambi bwa byakenzaYe, mwikale wela meeji ku byalwaYe kwenza, kadi upanga kumanya bidiYe munkaci mwa kwenza. Ke mùtù ngenzelu wa muntu nanku. Nenku ncintu anu cimwecimwe aci leelu ewu, nwènù bânà beetu. Ncintu anu cimwecimwe aci menemene. Kaa, ekelekele!

174 Twalukilaayi bwa kwenza ne dinwangana dya mijiki dinaye mu dyôdi, bwa baa pa buloba bapete mushindu wa kumona. Yesu wakamba ne: “Pângikalà mwambwibwe muumushiibwe pa buloba ebu, Nênkokè bantu bônso kúndi Mêmè.” Kabidi: “Yèyè udi umweumwe awu makeelela, leelu, too ne kashidi.”

175 Balombodi babwele mu Nyuma wa cya bushuwa, ne bimbi baa bisanji ne Musaki wa musambu, bintu byônso nebikumbanangane. Pa dîbà adi, katuyi kabidi ne bya difwikakajapu to, dîbà adi netwikale bafwanyikijiibwe Nende. Ebelu 13.8 mmwambe ne: “Yèyè udi umweumwe awu makeelela, leelu, too ne kashidi.”

176 Tudi bafwanyikijiibwe Nende mu Byenzedi 2. Tudi bafwanyikijiibwe naabo, ne dibatiiza dimwe, cintu cimwecimwe aci. Cyônso civwaYe musangu awu ne cyônso cidiYe, cyônso civwaYe ne cyônso cidiYe, ke citudi. Ke cyôci aci menemene.

177 Bidi anu bu ne mêmè muswe kwikala mwena Amerike mulelela, bikengela ngikale mufwanyikijiibwe ne cyônso civwaye, cyônso cidiye. Bikengela ngikale mufwanyikijiibwe naaci, piikalabi ne mêmè ewu ndi mwena Amerike mulelela.

178 Piikalabi ne mêmè ewu ndi mwena Amerike mulelela, nanku ngâkatүүлukila pa lubwebwe lwa Plymouth Rock. Amen. Eyo,

piikalabi ne mêmè ewu ndi mwena Amerike mulelela. Nansha wêwè peebe; wâkatùlukila peebe pa lubwebwe lwa Plymouth Rock pamwe ne baataatu beena lwendu. Pa lubwebwe lwa Plymouth Rock, paakatuulukilabo mwaba awu, mvwa naabo; nansha wêwè peebe, nwênù bônso.

<sup>179</sup> Ngâkabânda pa kbalu ne Paul Revere, twenda tupweka ne njila, bwa kudimwija ditunga ku njiwu. Aci ncyâ bushuwa menemene.

<sup>180</sup> Anu mu Valley Forge emu, ngâkasabuka musulu wa Delaware mukwate dibwe, pamwe ne musumba wa basalaayi bavwa, cyabibidi cyabo, kabayi ne bisabaata ku makâsà to. Ngâkanji kusambila bufuku bujima, ne George Washington. Ngâkasabuka Delaware mwikale ne cikeena-kumona munda mwa mwoyi wanyi. Tudi beena Amerike. Eyowa's, mukalenge. Mu Valley Forge, ncyâ bushuwa ne ngâkasabuka.

<sup>181</sup> Ngâkapingaja twasakidila pamwe ne baataatu baa Disakidila dya kumpala. Ngâkapingaja twasakidila kudi Nzambi. Piikalabi ne mêmè ewu ndi mwena Amerike mulelela, ngâkafwânyikijiibwa mwaba awu ku meesa awu.

<sup>182</sup> Piikalabi ne mêmè ewu ndi mwena Amerike mulelela, ngâkafwânyikijiibwa pângââkiimanà ne Stonewall Jackson.

<sup>183</sup> Piikalabi ne mêmè ewu ndi mwena Amerike mulelela, ngâkafwânyikijiibwa ku Difesto dya Cyayi dya mu Boston, eyowa's, mukalenge, patwakabenga bintu bya batukutakaja twêtù badimwene ne etu abidi. Ee, ndi bu Amerike wa bushuwa. Ngâkafwânyikijiibwa mwaba awu ne cyôci aci. Eyowa's, mukalenge. Kaa, ekelekele!

<sup>184</sup> Ngâkeela Ngonga wa Budishikaminyi, mu dituku dya matuku 4 dya kumpala dya ngondo wa mwandamutekete, mu cidimu cya 1776. Ngâkeela Ngonga wa Budishikaminyi apa ne ngâkamba ne twadishikaminyi. Bwa kwikala mwena Amerike mulelela, byakankengela cyôci aci.

<sup>185</sup> Ngâkafwânyikijiibwa ne bundu bwende mu Mvita ya ditombokela bukalenge bwa ditunga, muvwa bânâ baa muntu balwishangana nkaayaabo. Bikengela mêmè kwambula bundu bwende, anu mudibi ne bikengela ngambule butumbi bwende. Piikalabi ne mêmè ndi mwena Amerike, bidi binkengela nanku awu. Ngâkafwânyikijiibwa nende. Eyowa's, mukalenge.

<sup>186</sup> Ngâkafwânyikijiibwa ku Gettysburg kwaka, paakenza Lincoln muiyiki wende. Eyowa's, mukalenge.

<sup>187</sup> Mvwa mu cisanga cya Wake Island, pambidi paa mibidi ya basalaayi ivwa ipweka mashi ayi. Ngâkajuuka mu Wake Island.

Mu Guam, ngâkambulwisha bwa kubandisha dibendela adi.

<sup>188</sup> Mêmè ndi mwena Amerike mulelela. Amen. Cyônso cidiye, ke cîndi, ne ndi ndyumvwa maleela bwa ciine aci. Eyowa, bushuwa. Cyônso cikaadi Amerike mwikale, cyônso cidiye,

ke cîndi misangu yônsò, bwa kwikala mwena Amerike. Cyônsò civwaye aci, bikengela ngikale cyôci aci, bwalu ndi mufwanyikijiibwe nende yêyè.

<sup>189</sup> Bya mwomumwe, mu kwikala mwena Kilisto mulelela, bikengela wikale mufwanyikijiibwe ne cyôci aci.

<sup>190</sup> Ngâkayiisha ne Môsà, ne ngâkadimwij-. . . anyi ne Noa, ne ngâkadimwija bantu ku dinyooka divwa dilwa; bwa kwikala mwena Kilisto mulelela.

<sup>191</sup> Mvwa ne Môsà ku cipuka civwa cilakuka kapya aci. Mêmè kumona Dikunji dya Kapya. Mêmè kumona Butumbi Bwende. Mvwa ne Môsà mu cipeela mwamwa, bwa kwikala mwena Kilisto. Bikengela ngikale mufwanyikijiibwe ne cyônsò civwa Nzambi, bwa kwikala mwena Kilisto. Ngâkamòna Butumbi Bwende. Ngâkuumvwa Diyì Dyende. Mpindyewu kuuteeci bwa kungumvwija bwa kucinnyenga to, bwalu mvwaku. Ndi mumanye bìndi ngamba. Ngâkamòna cyakenzeka. Eyowa's, mukalenge.

<sup>192</sup> Mvwa ku Mbù Mukunze, pângâkamònà Nyuma wa Nzambi upweka ne wabulula mâyi eku ne eku; kî mbapicile mu cikutukutu cya malenge to, mudibo bateeta kwamba leelu ewu, kadi mu mâyi a mbù miikale ne bondoke bwa makàsà matwe ku makumi citeema [mètres 27,5]. Mêmè kumona Nyuma wa Nzambi. Mêmè kwendela ne Môsà mu buloba bûme amu, kukosolola Mbù Mukunze awu.

<sup>193</sup> Ngâkiimana ku luseke lwa Mukuna wa Sinaayi ne kumona mikungulu ne mikenyi byela. Mêmè kudya naabo Manà mwaba awu. Mêmè kunwa mâyi a ku Lubwebwe alu. Ncidi anu munkaci mwa kuànwà diloolo edi. Ngâkafwànyikijiibwa ne badi baa Manà. Ngâkafwànyikijiibwa ne baakanwa mâyi a ku Lubwebwe abu.

<sup>194</sup> Ngâkafwànyikijiibwa kabidi pakeela Yoshuwa mpungi, ne paakuupuka bimanu bya Yeleko.

Mvwa mu bwina bwa ntambwe ne Danyeke.

Mvwa mu cikutu cya kapya ne bânà baa beena Ebelu.

Mvwa pa Mukuna . . . ne Eliya pa Mukuna wa Kaamèlè.

<sup>195</sup> Mvwa ne Yone Mubatiiji, ne kumpala kwa badyudyanganyi abu. Mêmè kumona Nyuma wa Nzambi upweka. Mêmè kuumvwa Diyì dya Nzambi dyamba ne: “Ewu m’Mwanaanyi munanga Mwena munda mudi munsankisha bwa Mêmè kusòmbela.” Eyowa's, mukalenge. Ncya bushuwa ne ngâkafwànyikijiibwa nende. Ncya bushuwa menemene.

<sup>196</sup> Ngâkafwànyikijiibwa kuntu kwaka ku lukita lwa Lazârô, paakabiisha Ye Lazârô ku lufu. Ngâkafwànyikijiibwa, ne mukaji wa ku ciinà cya mâyi, paakamwambila Ye mpekaatu yende. Eyowa's, mukalenge.

197 Ncya bushuwa ne ngâkafwànyikijiibwa Nende mu lufu Lwende. Ne ngâkafwànyikijiibwa mu Paasaka wa kumpala. Mémè kubiika Nende ku lufu. Ndi mufwanyikijiibwe Nende mu lufu Lwende.

198 Mvwa ne bayiidi lukama ne makumi abidi abu, mu nzubu wa kuulu. Ngâkafwànyikijiibwa naabo kuulu aku. Eyi! Ngumvu—ngumvu butendeleedi bwambwedi. Kaa, ekelekele! Ngâkafwànyikijiibwa kuntwaku. Mémè ndi umwe wabo. Ngâkafwànyikijiibwa. Ngâkapeta dilabula dimwedimwe dyakapetabo adi. Mvwapu paakenzekabi, bwa kwikala mwena Kilisto mulelela. Ngâkadimwèna ne aanyi abidi mwakalwa Cipeepele cikole cya civuma aci. Ngâkadimwènaci ne aanyi abidi. Mémè kuumvwa bukole bwa Nzambi paakanyungishaBu. Mvwa ne baakaakula mu myakulu abu. Ngâkumvwa dilaabiibwa dilwamu. Mvwa naabo. Ngâkafwànyikijiibwa naabo dibà dyakabanga Nyuma Mwîmpè kwakula mu myakulu, wakwila kudibo.

199 Mvwa ne Peetelo, kumpala kwa badyudyanganyi mu Byenzedi 2, paakayiishaye diyiisha dinene dyakayiishaye adi. Ngâkafwànyikijiibwa nende. Eyowa's, mukalenge.

200 Mu Byenzedi 4, paakadisangishabo kaaba kamwe, mvwa naabo paakanyunga nzubu awu. Paanyima pa disangisha dya milombo adi, nzubu uvwabo basòmbèle awu wakanyunga. Ngâkafwànyikijiibwa naabo muntwamu.

Ngâkayiisha ne Pòlò pa Mukuna wa Mars. Eyowa's, mukalenge.

201 Mvwa ne Yone mu Cisanga cya Paatèmò, ne mémè kumona Dilwa Dyende dya cyakabidi.

Mvwa ne Luther mu dilongolola.

202 Mvwa ne Wesley, mupeeshanganyi wa dikima awu; cikunyi cya kadilu cipatula mwîkù, cikondo cya ditombokela dya ekeleeziya wa ba-Anglicans. Mémè mvwa nende.

203 Kadi's ke mémè ewu diloolo edi, mu cidimu cya 1964 emu, mu Philadelphie, Pennsylvanie, mufwanyikijiibwe ne kasumbu kaa mushindu umweumwe awu, ne dilabula dya mushindu umweumwe adi. Ndi ne cya kufwanyikijiibwa, bwa kwikala mwena Kilisto. Ndi ne cya kushaala mufwanyikijiibwe mwaba udi Dìyì dya Nzambi dimweneshiibwa. Ndi mufwanyikijiibwe ne kasumbu kadi kumvwa mudi Nyuma wa Nzambi wenza.

204 Ndi mufwanyikijiibwe ne kasumbu kadi kamanye ne Yèyè mmubuulula, kadi kamanye ne Yèyè udi umweumwe awu makeelela, leelu, too ne kashidi, kadi kamanye ne Eci kî ndikolesha dya maalu to. "N'Yesu Kilisto umweumwe awu makeelela, leelu, too ne kashidi." Ndi mufwanyikijiibwe ne kasumbu aku mwaba ewu, diloolo edi. Nansha nanku, nyawu babatwe dîna dya ne mbaabuludyanganyi, musumba wa



bakoleshi baa maalu, anu bwa Dîyì dya Nzambi. Kadi: “Mémè ncyèna ne bundu bwa Evanjeeliyo wa Yesu Kilisto to, bwalu Udi bukole bwa Nzambi bwa lupandu,” nenku ke mémè awu. Ndi ne bôbò badi mikanda mifundilangana idi ne mwoyi ya bwena yîngâmbì ayi, mishindikiibwe, Nzambi mubwikila mu mmwenekelu wa buntu, mu balume ne bakaji. Kaa!

<sup>205</sup> Nzambi cyakabidi mu *en morphe* Wende, muDibuulule ne muDimanyishe kudi cisamba Cyende. Mfumu munene Udi muteeke ku luseke Butumbi Bwende. “Katanci kakese aka baa pa buloba kabaakuMmona kabidi to. Nèngikale mubwikila ku mèsù abo. Kadi nwènu nenuMmone, bwalu Nèngikale neenu, ne munda mwenu mene, ntanta yònsò awu too ne ku dikumbana dya maalu ônsò, nshintuluka kuumuka ku Luther nya ku Wesley, anu nanku anu nanku, ngumuka ku Butumbi nya ku Butumbi. Ndi anu Nzambi umweumwe uvwa ne mwoyi awu, kadi mwikale ngalukila ku Butumbi bwa ku cibangidilu.” Aleluuyah!

<sup>206</sup> Yèyè wapandi cibwikilu cyònsò cya cyena mangumba, cimanu cyònsò cipumbishi cya dîyì. Dîyì dya bwena didi dyamba ne: “Kaa, aci’s ndikolesha dya maalu,” Yèyè mmupande kadi kupicila mu cyòci aci. Dîyì dya bwena divwa dipatukilamu, dyamba ne: “Kaa, bantu abu’s mbapâle,” Yèyè mmupande kadi kupicila mu ciine cibwikilu aci. Eyo, m’Mwenze nanku. “Kaa, kanwena mwa kucyenza to. Nwènu kanwena cîngâ cintu to anu musumba wa bakoleshi baa maalu.” Yèyè mmupande kadi kupicila mu cyòci aci. “Cintu paaci ne ndyondopa dya kudi Nzambi kacituku to.” Yèyè mmupande kadi kupicila mu cyòci aci, kaa, ekelekele, bwalu Dîyì Dyende dikaavwa dyambe ne Yèyè neàcyènzè. Kwèna mwa kucimuna Dîyì dya Nzambi to.

<sup>207</sup> Kadi’s ke Yèyè ucidi mwimane wawa, diloolo edi, Mucimunyi wa bukole, kacya wapanda cibwikilu cyònsò cya ba-Méthodistes, ba-Baptistes, ba-Presbytériens, cibwikilu cya mushindu mukwabo wònsò. Ucidi anu mwimane munkaci mwa cisamba Cyende, diloolo edi, kayi mucimunyiibwe kudi bilele to. Bantu bàmbe byaswabo kwamba abi, bènzè byaswabo kwenza abi, cyònsò cyaswabo kwenza aci. Nzambi udi ulwa, upanda upicila anu mu ciine cimanu cipumbishi cya dîyì amu.

<sup>208</sup> Nenku vulukaayi, batu bangambila ne, patu ndeke upanda cya bushuwa cimanu cipumbishi cya dîyì aci, kakutu mikalu ku lubilu lwende lwa makwashi to.

<sup>209</sup> Nyawu nkwambila’s, paudi upanda cimanu cya bilele aci, cya ne “Yesu ukaadi wa kale, Yèyè kacyenaku mpindyewu” aci, paudi wèwè usangana ne Yèyè udi umweumwe awu makeelela, leelu too ne kashidi, kakwena mikalu ku cidid Nzambi mufwanyine kwenza mwaba ewu mene mu cibilu eci to, ne kuleeja baa pa buloba aba cidibo naaci dijinga: kaciyi cisalu cya cinsangansanga cya buloba bujima to, kadi ditabuluja dya buloba bujima diikala dyùle ne dibatijiibwe ne Bwikadi bwa

Nzambi udi ne mwoyi, *en morphe* uDibwikila mu mubidi wa buntu. Aleluuyah! Mémè ndi ngitabuuja aci.

<sup>210</sup> Mupande cimanu cyònsò, cibwikilu cyònsò, cibwikilu cyònsò! Cintu nansha cimwe kacyna mwa kusokoka Bwikadi Bwende to. Padi bantu bapeta nzala mu myoyi yabo, kudi cibwikilu kampanda cikaadi pa kupandiibwa. Udi wêwè anu mwa kweyemena cyôci aci. Mupande cibwikilu cyònsò, ku Nyuma Mwimpè Wende munene!

<sup>211</sup> Nenku ke Yêyè ewu mwimane, diloolo edi, Mucimunyi wa bukole, umweumwe awu makeelela, leelu too ne kashidi; wondopa babeedi, ubatiiza beena kwitabuuja, anu mukaadiYe mwenzenze. M'Mucimunyi wa bukole. Démons mimana kupiisha ayi ke kuvukutayi mbilu eku. Eyowa's, mukalenge. Yôyi itu anu mu mbilu, pakaadibi ne n'Yêyè awu ukaadi apa.

<sup>212</sup> Bwa kujikija, ndi mufwanyine kwamba nunku. Kuvwa... Ngâkabala bwalu butubo balonde, kukaadi bidimu byâbûngi, bamba bwa mwimbi wa kale wa cindaala. Uvwa ne cindaala cya kale ciwabo bajinga kusumbisha. Nukaadi bumvumvwe bwalu ebu, misangu ne misangu. Nenku bavwa bajinga kucisumbisha ku mushinga kampanda. Ke musumbishanganyi kwamba ne: "Nganyi udi muswe kumpa mushinga *kampanda*?" Ngela meeji baakamwela mushinga wa tuubicyele tukese, pâmwâpa meeyâ makumi ataanu [650 Fc], anyi cintu kampanda. "Musangu umwe, misangu ibidi, . . ."

<sup>213</sup> Dyakamwe, muntu mukwabo kjuukila lwa paanyima apu. Yêyè ne: "Indila kakese." Kulwa tamakatamaka kucyambula. Twânjibi kwela meeji ne wakimba musambu ewu ne:

Kudi Mpokolo mûle ne Mashi,  
Makoka mu mijilu ya Emanuwele;  
Bangènzâmpèkààtù badînè mwinshi mwa  
lukoka alu,  
Badi bajimija makeji ônsò a dipiila dyabo.

<sup>214</sup> Pashiishe mmwenze anu uciteeka panshi anyi, kakuvwa dîsù dyakabenga kupwekesha cinsonji mu mwaba awu to. Ke awu kwamba ne: "Nganyi udi muswe kwela mushinga?"

<sup>215</sup> Muntu kwamba ne: "Binunu bitaanu." "Binunu dikumi." Cikaavwa kaciciyi cya ditwa mushinga to. Bwa cinyi? Mumanyi mukulu wa—wa cindaala wakasokolola mushinga mulelela wa cilumyana.

<sup>216</sup> Kaa, mwaneetu wa balume, mwaneetu wa bakaji, lekela mpindyewu Mumanyi wa Dîyi edi, Yêyè mene wâkaDifûnda awu, Nyuma Mwimpè munene awu, alaabe mafuta a dinanga ku kakombo Kende, kadi âkëndèshè myaba yònsò mu mwoyi webe.

Kudi Mpokolo mûle ne Mashi,  
Makoka mu mujilu wa Emanuwele.

217 Neumone mushinga mu kaabujima, ne neumone Nzambi mubuulula ulwa umweka patooke tòò. Bwalu ne, Yèyè udi anu umwèumwè wa bwena uvwaYe paakaponaYe mu Dituku dya Mpenta, pa cisamba, paakaDi'kenos'aYe apu, "mudipumwine" anu mu Cyôci aci. Ncya bushuwa.

218 Wèwè udi wamba ne: "Mwaneetu Branham, nkaadi muteeteteete. Nkaadi muteeteteete. Nkaadi mwenzenze *cikampanda, cikansanga, ne cikankenga.*"

219 Dìngà dituku mvwa ngenza disangisha mu Carlsbad, mu Nouveau-Mexique. Ke twètù kupweka kuya mu cisokomenu cinene cya tupulukusu eci lwa kwìnshi kwaka. Kadi muvwa mumweka anu mwa mwenza bwôwà, kadi twètù kupwekamu. Nenu muntu awu, paakapwekaye muntwamu mu kaaba kiine aku, yèyè—yèyè kujima dyakamwe makênkè. Nenu, kaa, ekelekele, nudi mwa kudifwanyikijila mwîdimà uvwamu. Ncienze anu. . . Mudi mwîdimà wa wèwè mufwanyine kulenga ne byanza.

220 Nenu anu bu mushindu awu ke udi bikondo byenda bishaala's, patudi tumona ekeleeziya upanga kujingulula Dîyì dya Nzambi; panudi numona bânà beetu baa bakaji baa mu Siona benza maalu mudibo benza emu; panudi numona bânà beetu baa balume banwa mfwanka ne maala, ne—ne biikale benza mineku ya bundu ne bintu bikwabo, kadi batungunuke anu ne dilama dya ditonda dyabo mu Kilisto. Kaa, ekelekele, s'kudi mîdimà's. Kudi mîdimà ya fitutuu.

221 Tudi tumona cimanyinu cya Dilwa Dyende. Nekwikale. . . Kutu misangu yônso anu kutamba kwikala mîdimà kumpala kwa bufuku kucyabu. Pashiishe Mutooto wa mu Dinda upatuka bwa kusekelela dituku, ne kudikobwela, ne kuleeja ne ndyadi dilwa. Monaayi.

222 Mwômò amu, mbenze anu bajima makênkè awu anyi, muvwa kânà kaa bakaji kakese kaakabanga kwela mbila ya ipanda mutu. Kuvwa kânà kaa balume kiimane ku luseke lwa mulombodi awu, kavwa kamone mulombodi awu paakajimaye makênkè awu mushindu awu. Kadi mwaneetu wa bakaji mutekete awu ukaavwa anu mwambe kuuminyina. Uvwa wela mbila mikole, utupika waya muulu walukila. "Kaa! Ncinyi ciikala mwa kwenzeka pashiishe? Ncilumbu kaayi? Ncilumbu kaayi?"

223 Nudi bamanye ewu cyakambaye paakeelaye lwende lubila? Wakamba ne: "Lekela bwôwà, mwakunyaanyi wa bakaji. Kudi muntu mwaba ewu udi mwa kuteemesha makênkè."

224 Teeleja, wèwè mwakunyaanyi wa bakaji, udi mufwanyine kudiyambidila ne tudi bakese ne banyaabanya. Kadi, lekela bwôwà. Kudi Muntu mwaba ewu Udi mwa kuteemesha Makênkè. Ke Nyuma Mwîmpè. Nudi nwitabuuja nanku anyi? [Disangisha didi dyamba ne: "Amen."—Muf.]

225 Twinyikaayi mitu yetu bwa katanci kakese. Numfwileku luse bwa dinulama dyanyi.

226 Éyì Nzambi munene wa mu Dyulu, mwikale uDibuulula, uDivungulula, uDimanyisha, Mfumu munene wa Butumbi, angata tuubifwanyikijilu tukese etu, diloolo edi, ne utumacishile mu myoyi ya bantu aba. Nenku swaku bwa tumone Yêyè udi mubuulula awu, Yêyè Wâkapweka e kupanda cilâmbâ cikudika cya mu ntempelo awu; ne pashiishe kupatuka buludi mu cibwikilu aci, kupweka cyakabidi ne kubwela mu bibwikilu bya buntu, mu Dituku dya Mpenta; utu kwônsò eku anu umweumwe awu, ushintuluka uumuka ku Butumbi uya ku Butumbi.

227 Nenku mpindyewu nyewu tukaadi baalukile bu mudi bufuki bwônsò, bwenza, baalukile buludi ku Dimiinu dya ku cibangidilu, kuumuka ku cikondo cya ekeleeziya kuya ku cikwabo. Nenku mu cikondo cya ndekeelu eci, ke twêtù aba, baalukile buludi ku Cintu cya ku cibangidilu cyakapona mu Dituku dya Mpenta aci, bwa kuuja Mufundu wônsò ne: “Bukênkè ku dîbâ dya diloolo,” ne: “Byenzedi bîndi ngenza nenûbyênzè peenu,” ne bintu búngì cyakaa byûdi Wèwè mulaye mu Diyì Dyebe.

228 Taatu, kwôkò kwikale muntu mwaba ewu utu kacya kayi mwanji kuya dyamwamwa dya cibwikilu aci, anyi kwikale muntu mwaba ewu ukaadi anu mutentule mukwende ukàadi yêyè muye dyamwamwa dya cibwikilu, fila ngâsâ diloolo edi, Taatu. Swaku bwa bamone Mucimunyi wa bukole wawa udi mwimane mwaba ewu ewu, mûle tente ne ngâsâ ne bukole, bwa kufwilangana luse. Twënzèlèku nanku, Taatu.

229 Nenku pacidi mitu yetu miinyika apa, nkufwanyineku kwikala bamwe mwab'ewu anyi? Mbanganyi, mûndi mufwanyine kwamba, badiku bafwanyine kwamba ne: “Mwaneetu Branham, nyewu ngela cyanza cyanyi muulu. Nsambidileku?” Lama anu mutu webe mwinyika, kadi ela cyanza cyebe muulu ne: “Ndi muswe kuya dyamwamwa dya cibwikilu cyônsò, too ne pângââpetâ mushindu wa kumona cya bushuwa Mucimunyi awu.” Nzambi akubeneshe. Ekelekele, monaayi anu byanza! Muulu mu bisasa, ku dyabalume? Nzambi anubeneshe. Mu bisasa lwa paanyima paapa? Elaayi. . . Nzambi anubeneshe. Ikalaayi ne meeji matooke menemene. Ku dyabakaji? Ela cyanza cyebe muulu, wamba ne: “Mwaneetu Branham, ndi mufwanyine kwikala mwena Kilisto kukaadi bidimu, kadi, ncyâ bushuwa ne, kacya nciyu mwanji kuya dyamwamwa dya cibwikilu aci to. Ncyâ bushuwa ne nciyu mwanji kucyenzaku to. Ncyêna mupete Cyôci cyakapetabo bôbô cikondo aci to.” Leelu ewu, tudi ne. . . “Mêmè ndi mucu mutenteka.”

230 Angata cilongo cidibo batenteke mu mwaba wa dikoleshila lukasalukasa, bikengela wikale ucyengeleka, ucilaaba cyanza,

ucyela manga, ucyela mâyi. Kadi mucu wa mudimenene mwikale ukolela mu cipeela mwamwa wawa, cilongo anu cya mushindu umweumwe awu, cifwanangane ne cyôci aci; kacyi cipetaku tuumâyi nansha twa kânà to, kadi kakwena twishì tulandalaku to. Ncikayapale. Ncyetu cya bushuwa eci.

231 Nudiku mwa kufwanyikija bwena Kilisto ne bwena Kilisto bwa leelu ewu ebu, ne buvwaku cikondo cyacya abu anyi? Nudiku mwa kudifwanyikijila musumba ewu, batudi tubiikila ne mbeena Kilisto leelu ewu aba, pa buloba bujima, biikale bu baa paanyima paa Mpenta baba; babengeleka ne babalaaba maanyi, buumuka ku ewu ekeleeziya baya ku mukwabo, ne, bôbô bambe cintu kampana cyûdi kuyi wêwè muswe to, ujuuka upatuka? Nunku, kaa, nudiku mwa kudifwanyikijila ciine aci anyi? To. Mbwalu kaayi bwine abu? Mbintu bitentula.

232 Michel-Ange, uvwa mwenze lupingu lwa Môsà awu, udi mwa kupeta lupingu lutentula ku lwôlò alu, ku mushinga mupuutula. Kadi, bwa lwa ntwadijilu alu?

233 Ewu wâkazòla Meesa a Mukalenge awu, ngela meeji ne dizola dya ntwadijilu adi ndifwanyine kuyiila miliyô ya ndola, bu wêwè mene mwa kupeta mushindu wa kudisumba. Ncyêna nansha mumanye ne diine adi didi penyi to. Kadi udi mwa kusumba cimfwanyi cya cyôci aci ku mushinga mupuutula wa ndola umwe ne meeyà makumi citeema ne mwandamukulu [3.200 Fc]. Udi mwa kupeta.

234 Nunku ke mushindu awu udibi leelu ewu. Mwena Kilisto wa mushinga mupuutula, mutentula, mwikale anu mwena ekeleeziya cyanaana, udi mwa kumusumba pambelu apa ku mucu wa mfwanka anyi ku—anyi ku maala etu a ciibidilu aa. Anyi, bwa mukaji wa nsuki mikosa anyi wa mishiku milaaba kapenta, udi mwa kumusumba nî nku cinyi cyônsò naka mu myodele ya pa buloba eyi. Kadi kwêna mwa kulenga wa cya bushuwa awu to.

235 Mêmè ndi m'Mumona mumweneke patooke, umweumwe awu makeelela, leelu, too ne kashidi.

236 Kaa, wêwè mwena Kilisto, kwêna muswe bwa kwikala mwena Kilisto wa cya bushuwa anyi? Piikalaku bakwabo bavwa kabayi beele byanza byabo muulu to, nudiku mwa kwela anyi? Ee, nkaadi anu mene nsambila. Nzambi akubeneshe. Nzambi akubeneshe. Kaa, abi's mbîmpè be. Anji tangilaayi anu byabya.


237 Taatu wetu wa mu Dyulu, “Dîyi Dyebe kadyakwalukila kûdi Wêwè kadiyi ne cididi dyenze to.” Uvwa ng’Wêwè wâkenza mulayi. Mêmè ndi mwambule bujitu anu bwa kwamba ne Wêwè ngwâkaDyâmba. Ndi mêmè ngambulula anu Mèyi Ebe. Wêwè wâkamba ne: “Ewu udi uumvwa Dîyi Dyanyi, ne witabuuja Ewu wâkantûma Mêmè, udi ne Mwoyi wa Cyendelele.” Wêwè ngwâkalaya nanku.

<sup>238</sup> Nenku, Mukalenge, tudi bamanye ne tudi ne bintu bitentula abi leelu ewu, bàábúngì badi bamba ne mbiitabuuje, kadi paabi, kabayi biitabuuje nansha. Bidi bidileeja patooke. Kadi, Mukalenge, kudi kabidi baa bashuwashuwale, badiku.

<sup>239</sup> Ndi ndomba bwa Wèwè kutwenzela, mwab'ewu, diloolo edi, bwa mulume yònsò ne mukaji yònsò, mwànà wa balume anyi wa bakaji, nansha yèyè wa ditunga kaayi, nansha wa dikoba kaayi, nansha wa ekeleeziya kaayi, Éyì Nzambi, umuuje. Swaku bwa amone dimweneshiibwa dya cya bushuwa dya Yesu umweumwe awu leelu, anu munkaci mwetu mene, mushindu uvwaYe Dituku dya Mpenta, paakaDibuululaYe bwa cikondo eci, mwikale Nyuma Mwîmpè. Twènzèlèku nanku, bu mutudi tumona Méyì uula, biprofeta bikumbana!

<sup>240</sup> Tudi tufwanyikija, leelu ewu, cidibo babiikila bu ekeleeziya wa pa buloba kwaka, Nsangilu wa Maeeleeziya wa Buloba bujima, tufwanyikija ciine aci ne mulayi wa Mpenta anyi? Kakwena cya difwanyikija ciine to, nansha cikese. Katwena mwa kusukwisha byetu bilàmbà bya manyaanu ku awu ticket to.

<sup>241</sup> Kadi, Mukalenge Nzambi, bu twètù mwa kuswa kwalukila ku Mpokolo awu, kudi mushindu mulongolola wa kukezudiibwa, pa dîbà adi dilabula dyetu ne Dìyì dya Nzambi nebinwangane. Pa dîbà adi, tudi mwa kulomba bidi bu byetu. Twènzèlèku nanku, Mukalenge, diloolo edi, pândi ndambula bantu aba mu byanza Byebe apa. Peesha muntu ne muntu bitudi naabi dijinga, Taatu. Tudi tulomba mu Dînà dya Yesu. Amen.

<sup>242</sup> Nzambi anubeneshe. Twasakidilaayi, wa manza tente, bwa diimana dyenu dya kuulu, bindile mukùngùlù mule. Nenku mèmè ndi ndomba luse bwa dinulama too ne pa dîbà dikumi ne tusunsa dikumi. Nzambi ikale neenu too ne pângàànùmònà mu dinda. Ndi mpingaja bulombodi bwa disangisha mpindyewu, ngela meeji, kudi mfumu wa cibilu. 

*NZAMBI WA BUKOLÈ MUBUULULA KUMPALA KWETÙ* LUA64-0629

(The Mighty God Unveiled Before Us)

Diyiisha edi dya Mwaneetu William Marrion Branham, dyakayiishabwa bwa musangu wa kumpala mu Anglais mu dimwe diloolo, mu matuku 29 a ngondo mwisambombo, cidimu cya 1964, bwa cibilu cya Bwobumwe bwa Buloba bujima bwa Beena Kantu-ku-Byanza baa Evanjeeliyo mu Kaabujima ku Cilaala-beenyi cya Bellevue-Stratford mu Philadelphie, Pennsylvanie, U.S.A. Ndyumusha pa mukaba wa mêtù ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2018 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)